

四庫全書

史部

欽定四庫全書

史部

通志卷一百五十一

詳校官編修_臣李潢

編修_臣裴謙覆勘

覆校官助教_臣金學詩

校對官待詔_臣胡士震

謄錄監生_臣蔣錦城

欽定四庫全書

通志卷一百五十一

宋右迪功郎鄭

樵漁仲撰

列傳第六十四

後魏

孫紹 張普惠 成淹 范紹 劉桃符 鹿愈

張燿 劉道斌 董紹 馮元興 索翻 陽

尼從孫固 賈思伯弟恩 祖瑩 爾朱榮子菩提

固從兄藻

同

又羅

文殊

文暢

文畧

榮從子兆

榮從弟彦

伯

彦伯弟仲遠

仲遠弟世隆

榮從父弟度

律

榮從祖

兄子天光

朱瑞

叱列延慶

斛斯椿

賈顯

度

弟智

樊子鵠

侯深

賀拔允

侯莫陳悅

念

賢

梁覽

雷紹

毛遐

弟鴻賓
鴻顯

乙弗朗

辛雄

從父兄纂

從族祖

琛

琛子悠

俊

楊機

高恭

父崇
兄謙之

綦儁

山偉

宇文忠之

費穆

孟威

孫紹字世慶昌黎人也少好學通涉經史初為校書郎

稍遷給事中後為門下錄事好言得失與常景共修律

令延昌中紹表曰臣聞建國有計雖危必安施化能和
雖寡必盛政乖人理雖合必離作用失機雖成必敗此
乃古今同然百王之定法也今二號京門了無嚴防南
北二中復闕固守長安鄴城股肱之寄穰城上黨腹背
所馮四軍五校之軌領護分事之式徵兵儲粟之要舟
車水陸之資山河要害之權緩急去來之用持平赴救
之方節用應時之法特宜修置以固堂堂之基持盈之
體何得而忽且法開清濁而清濁不平申滯理望而卑

寒亦免士庶同悲兵徒懷怨中正賣望於下里主案舞
筆於上臺真偽混淆知而不糾得者不欣失者倍怨使
門齊身等而涇渭奄殊類應同役而苦樂縣異士人居
職不以為榮兵士役苦心不忘亂故有競棄本生飄藏
他土或詭名託養散沒人間或亡命山藪漁獵為命或
投杖彊豪寄命衣食又應遷之戶逐樂諸州應留之徒
避寒歸暖職人子弟隨榮浮游南北東西卜居莫定關
禁不修任意取適如此之徒不可勝數爪牙不復為用

百工爭棄其業混一之計事實闕如考課之方責辦無
日流浪之徒決須精校今彊敵窺時邊黎伺隙內人不
平久戍懷怨戰國之勢竊謂危矣必造禍源者北方鎮
戍之人也若夫一統之年持平用之者大道之計也亂
離之期縱橫作之者行權之勢也故道不可久須文質
以換情權不可恒隨洿隆以牧物文質應世道形自安
洿隆獲衷權勢亦濟然則王者計法之趣化物之規圓
方務得其境人物不失其地又先帝時律令並議律尋

施行令獨不出十餘年矣臣以今之為體即帝王之身分處百揆之儀安置九服之節乃是有為之樞機世法之大本也然修令之人亦皆博古依古撰置大體可觀比之前令精麤有在但主議之家大用古制若令依古高祖之法復須外降誰敢措意有是非哉以是爭故久廢不理然律令相須不可偏用今律班令止於事甚滯若令不班是無典法臣下執事何依而行臣等修律非無勤止署下之日臣乃無名是謂農夫盡力他食其秋

功名之所實懷於悵正光初兼中書侍郎紹性抗直每
上封事常至懇切不憚犯忤但天性疎脫言乍高下時
人輕之不見採覽紹兄世元善彈箏早卒紹後聞箏聲
便涕泗嗚咽捨之而去後為太府少卿曾因朝見靈太
后謂曰卿年稍老矣紹曰臣年雖老臣卿乃少太后笑
之遷右將軍太中大夫紹曾與百僚赴朝東掖未開守
門候旦紹於衆中引吏部郎中辛雄於衆外竊謂曰此
中諸人尋當死盡唯吾與卿猶享富貴未幾有河陰之

難紹善推祿命事驗甚多知者異之永安中拜太府卿
以前參議正光士子歷賜爵新昌子後卒於右光祿大
夫贈尚書左僕射謚曰宣子伯元襲爵

張普惠字洪賑常山九門人也身長八尺容貌魁偉精
於三禮兼善春秋百家之說太和十九年為主書帶制
局監頗為孝文所知轉尚書都令史任城王澄重其學
業為其聲價澄為雍州刺史啓普惠為府錄事參軍尋
行馮翊郡事澄功哀在身欲七月七日集文武北園馬

射普惠奏記於澄曰竊聞三殺九親別踈昵之叙五服六術等哀麻之心皆因事飾情不易之道者也然則莫大之痛深於終身之外書策之哀除於喪紀之內外者不可無節故斷之以三年內者不可遂除故敦之以日月况禮大練之日鼓素琴蓋推以即吉也小功以上非虞祔練祥不沐浴此拘之以制也曾子問曰相識有喪服可以與於祭乎孔子曰總不祭又何助於人祭既不與疑無宴食之道又曰廢喪服可以與於饋奠之事乎

子曰脫哀與奠非禮也注云謂其忘哀疾愚謂除喪之始不與饋奠小功之內其可觀射乎雜記云大功以下既葬適人人食之其黨也食之非其黨則不食食猶擇人於馬射為或非宜伏見明教立射會之限將以二七令辰集城中文武肄武藝於北園行揖讓於中舍時非大閱之秋景涉妨農之節國家縞禪甫除殿下功哀仍襲釋而為樂以訓百姓便是易先王之典教忘哀戚之情恐非所以昭令德示子孫者也案射儀射者以禮樂

為本哀而從事不可謂禮鐘鼓弗設不可謂樂捨此二
事何用射為又七日之戲令制無之班勞所施慮違事
體府庫空虛宜待新調乞至九月備飾盡行然後奏狸
首之章宣矍相之命聲軒縣建雲鉦神人忻暢於斯時
也澄意納其言託辭自罷乃答曰今雖非公制而此州
承前已有斯式且纂文習武人之常藝豈可於常藝之
間要湏令制乎禮兄弟內除明哀已殺小功客至主不
絕樂聽樂則可觀武豈傷直自事緣湏罷先以令停方

獲此請深具來意澄轉楊州啓普惠以羽林監領鎮南
大將軍開府主簿普惠既為澄知歷佐二藩甚有聲譽
還朝仍羽林監澄遭太妃憂臣寮為立碑頌題碑欲云
康王元妃之碑澄訪於普惠普惠答曰謹尋朝典但有
王妃而無元字魯夫人孟子稱元妃者欲下與繼室聲
子相對今烈懿太妃作配先王更無聲子仲子之嫌竊
謂不假元字以別名位且以氏配姓愚以為在生之稱
故春秋夫人姜氏至自齊既葬以謚配姓故經書葬我

小君文姜又曰來歸夫人成風之祿皆以諡配姓古者婦人從夫諡今烈懿太妃德冠一世故特蒙褒錫乃萬代之高事豈容於定名之重而不稱烈懿乎澄從之後為步兵校尉以本官領河南尹丞宣武崩坐與甄楷等飲酒游從免官故事免官者三載之後降一階而叙若才優擢授不拘此限熙平中吏部尚書李韶奏普惠有文學依才優之例勅除寧遠將軍司空倉曹參軍朝議以不降階為榮時任城王澄為司空表議書記多出普

惠廣陵王恭北海王顥疑為所生祖母服朞與三年詔
羣寮會議普惠議曰謹案二王祖母皆受命先朝為二
國太妃可謂受命於天子為始封之母矣喪服慈母如
母在三年章傳曰貴父命也鄭注云大夫之妾子父在
為母大功則士之妾子為母朞父卒則皆得伸此大夫
命其妾子以為母所慈猶曰貴父命為之三年况天子
命其子為列國王命其所生母為國太妃反自同公子
為母練冠之與大功乎傳曰始封之君不臣諸父昆弟

則當服其親服若魯衛列國相為服菁判無疑矣何以明之喪服君為姑姊妹女子子嫁於國君者傳曰何以大功尊同也尊同則得服其親服諸侯之子稱公子公子不得禰先君然則兄弟一體位列諸侯自以尊同得相為服不可還準公子遠壓天王故降有四品君大夫以尊降公子大夫之子以壓降名例不同何可亂也禮大夫之妾子以父命慈已申其三年太妃既受命先帝光昭一國二王胙土茅社顯錫大邦舍尊同之高據附

不禍之公子雖許蔡失位亦不是過服問曰有從輕而重公子之妻為其皇姑公子雖壓妻尚獲申况廣陵北海論封君則封君之子語妃則命妃之孫承妃纂重遠別先皇更以先后之正統壓其所生之祖嫡方之皇姑不以遙乎今既許其申服而復限之以朞比之慈母不亦爽歟經曰為君之祖父母父母妻長子傳曰何以朞父母長子君服斬妻則小君父卒然後為祖後者服斬今祖乃獻文皇帝諸侯不得祖之母為太妃盖二王三

年之證議者近背正經以附非類差之毫毛所失或遠
且天子尊則配天莫非臣妾何為命之為國母而不聽
子服其親乎記曰從服者所從亡則已又曰不為君母
之黨服則為其母之黨服今所從既亡不以親服服其
所生則屬從之服於何所施若以諸王入為公卿使同
大夫者則當今之議皆不須以國為言也今之諸王自
同列國雖不之國別置臣寮主食一方得不以諸侯言
之敢據周禮輒同三年當時議者亦有同異國子博士

李郁於議罷之後書難普惠普惠據禮還答鄭重三反
郁議遂屈轉諫議大夫澄謂普惠曰不喜君得諫議唯
喜諫議得君時靈太后父司徒胡國珍薨贈相國太上
秦公普惠以前世后父無太上之號詣闕上疏陳其不
可左右畏懼莫敢為通會聞胡家穿墳下墳有盤石乃
密表曰竊見故侍中司徒胡公懷道含靈實誕聖后近
樞克維允之寄居槐體論道之名故以功餘九錫褒假
鸞肅深聖上之加隆極慈后之至愛憲章天下不亦可

乎而太上之號竊謂未衷何者禮記曰天無二日土無
二王嘗禘郊社尊無二上竊謂高祖受禪於獻文皇帝
故仰尊為太上皇此因上上而生名也皇太后稱令以
繫勅下盖取三從之道遠同文母列於十亂則司徒為
太上恐乖繫勅之意易曰困於上者必反於下比克吉
定兆而以淺改卜羣心悲惋亦或天地神靈所以垂至
戒啓聖情伏願停司徒逼同之號從卑下不踰之稱則
天下幸甚太后覽表親至國珍宅召集五品以上博議

其事任城王澄太傅清河王懌侍中崔光御史中尉元
匡尚書崔亮並同有難普惠並以理正之無所屈廷尉
少卿索翻曰周官上公九命上大夫四命命數雖殊同
名為上何必上者皆是極尊普惠厲聲訶翻曰禮有上
卿上士何止大夫與公但今所行以太加上二名雙舉
不得非極雕蟲小藝微或相許至於此處豈卿所及翻
甚有慙色默不復言議者咸以太后當朝志相黨順遂
奏曰張普惠時雖不屈然非臣等所同渙汗已流請依

前詔太后復遣元乂賈璩宣令謂普惠曰朕之所行孝
子之志卿之所陳忠臣之道羣公已有成議卿不得苦
奪朕懷後有所見勿得難言初普惠被召傳詔馳驛騶
馬來甚迅速佇立催去普惠諸子憂怖涕泗普惠謂曰
我當休明之朝掌諫議之任若不言所難言諫所難諫
便是唯唯曠官尸祿人生有死死得其所夫復何恨然
朝廷有道汝輩勿憂及議罷旨勞還宅親故賀其幸甚
時中山杜弼遺書普惠曰明侯深儒碩學身負大才執

此公方來居諫職蹇蹇如也諤諤如也一昨承在胡司
徒第當庭面諍雖問難鋒生而應對響出宋城之帶始
交魯門之析裁警終使羣后逡巡庶寮拱默雖不見用
於一時固已傳美於百代聞風快焉敬裁此白普惠美
其此書每為口實普惠以天下人調幅度長廣尚書計
奏復徵綿麻恐人不堪命上疏曰伏聞尚書奏復綿麻
之調遵先皇之軌夙宵惟度欣戰交集仰惟高祖廢大
斗去長尺改重稱所以愛百姓從薄賦知軍國須綿麻

之用故云幅度之間億兆應有綿麻之利故絹上稅綿八兩布上稅麻十五斤萬姓得廢大斗去長尺改重稱荷輕賦之饒下適於綿麻而已故歌僊以供其賦奔走以後其勤夫信行於上則億兆樂輸於下自茲已降漸至長濶百姓嗟怨聞於朝野伏惟皇太后未臨朝之前陛下居諒闇之日宰輔不尋其本知天下之怨綿麻不察其幅廣度長稱重斗大草其所弊存其可存而特放綿麻之調以悅天下之心此謂悅之不以道愚臣所以

未悅者也普惠又表乞朝直之日特聽奉見自此之後
月一陛見又以孝明不親視朝過崇佛法郊廟之事多
委有司上疏曰伏惟陛下重暉纂統欽明文思天地屬
心百神佇望伏願躬致郊廟之虔親紆朔望之澤釋奠
成均竭心千畝明發不寐潔誠禋祫孝悌可以通神明
德教可以光四海然後精進三寶信心如來道由化深
故諸漏可盡法隨禮積故彼岸可登量撤僧寺不急之
華還復百官久折之秩已興之構務從簡成將來之造

權令停息但仍舊貫何必改作庶節用愛民法俗俱賴
尋別勅付外議釋奠之禮時史官尅日蝕豫勅罷朝普
惠以逆廢朝非禮上疏陳之又表論時政得失一曰審
法度平斗尺調租務輕賦役務省二曰聽輿言察怨訟
先皇舊事有不便於政者請悉追改三曰進忠謇退不
肖任賢勿貳去邪勿疑四曰興滅國繼絕世勲親之允
所宜收叙書奏孝明靈太后引普惠於宣光殿隨事難
詰延對移時太后曰小小細務一一翻動更成煩擾普

惠曰聖上之養庶物若慈母之養赤子今赤子幾臨危
壑將赴水火以煩勞而不救豈赤子所望於慈母太后
曰天下蒼生寧有如此苦事普惠曰天下之親懿莫重
於太師彭城王然遂不免枉死微細之苦何可得無太
后曰彭城之苦吾已封其三子何足復言普惠曰聖后
封彭城之三子天下莫不忻至德知慈母之在上臣所
以重陳者凡如此枉乞垂聖察太后曰卿云興滅繼絕
意復誰是普惠曰昔淮南逆終漢文封其四子蓋骨肉

之不可棄親親故也竊見咸陽京兆乃皇子皇孫一德之虧自貽悔戾沈淪幽壤緬焉弗收豈不是興滅繼絕之意太后曰卿言有理當命公卿博議及任城王澄薨普惠荷其恩待朔望奔赴至於禪除雖寒暑風雨無不必至初澄嘉賞普惠臨薨啓為尚書右丞靈太后既深悼澄覽啓從之詔行之後尚書諸郎以普惠地寒不應便居管轄相與為約並不欲放上省紛紜多日乃息正光二年詔遣楊鈞送蠕蠕主阿那瓌還國普惠謂遣之

將貽後患上疏極言其不可表奏不從魏子建為益州
刺史有賊罪普惠被使驗之事遂得釋故子建父子甚
德之時梁西豐侯正德詐稱降款朝廷皆謂當迎普惠
請付揚州移還蕭氏不從俄而正德果逃還後除光祿
大夫右丞如故先是仇池武興郡氏數反西垂郡戍租
運久絕詔普惠以本官為持節西道行臺給秦岐涇華
雍豳東秦七州兵文武三萬人任其召發送南秦東益
二州兵租分付諸戍其所部將統聽於關西牧守之中

隨機召遣軍資版印之屬悉以自隨事訖還朝賜絹布一百疋時詔訪冤屈普惠上疏多所陳論出除東豫州刺史淮南九戍十三郡猶因梁前弊別郡異縣之人錯雜居止普惠乃依次括比省減郡縣上表陳狀詔許之宰守因此綰攝有方奸盜不起人以為便普惠不營財業好有進舉敦於故舊冀州人侯堅固少時與其游學早終其子長瑜普惠每於四時請祿無不減贍給其衣食及為豫州啓長瑜解褐攜其合門拯給之在州卒謚

曰宣恭

成淹字李文上谷居庸人也好文學有氣尚仕宋為員外郎領軍主援東陽歷城皇興中降慕容白曜赴闕授兼著作佐郎獻文於仲冬之月欲巡漠北朝臣以寒甚固諫並不納淹上接輿釋游論帝覽之詔尚書李訢等曰卿諸人不如成淹論通釋人意乃勅停行太和中文明太后崩齊遣其散騎常侍裴昭明散騎侍郎謝竣等來弔欲以朝服行事主客報之云有常式何得以朱衣

入凶庭昭明言本奉朝命不容改易孝文勅尚書李冲
令選一學識者更與論執冲奏遣淹昭明言魏朝不聽
朝服行禮義出何典淹言吉凶不同禮有成數元冠不
弔童孺共聞昔李孫將行請遭喪之禮千載之下猶共
稱之卿遠自江南奉慰不能式遵成事方謂義出何典
何其異哉昭明言齊高帝崩魏遣李彪通弔於時不素
服齊朝亦不以為疑那得苦見要逼淹言彪通弔之日
朝命以弔服自隨而彼不遵高宗追遠之慕乃踰月即

吉彪行弔之時齊之君臣皆已鳴玉盈庭韶璫曜目彪
為行人何容獨以素服間衣冠之中我皇帝仁孝之性
侔於有虞處諒闇以來百官聽於冢宰卿豈得以此方
彼也昭明乃搖膝而言曰三皇不同禮亦安知得失所
歸淹言若如來談則以虞舜高宗為非也昭明等相顧
笑曰非孝者宣尼有成責行人亦弗敢言使人唯齋袴
褶此既戎服不可以弔幸借衣幅以申國命今為魏朝
所逼還南之日必得罪本朝矣淹曰彼有君子也卿將

折衷之還南日應有高賞若無君子也但令有光國之
譽雖非理得罪亦復何嫌南史董狐自當直筆帝聞淹
與昭明言謂李冲曰我所用得人仍勅送衣幅給昭明
等明旦引昭明等入皆令文武盡哀淹後除正佐郎其
後齊遣其散騎常侍庾革散騎侍郎何憲主事邢宗慶
等來聘孝文勅淹接於外館宗慶語淹言南北連和既
久而比棄信絕好為利而動豈是大國善隣之義淹言
夫為王者不拘小節豈得眷眷守尾生之信且齊先主

歷事宋朝當應便爾欺奪宗慶庾華及從者皆相顧失色何憲知淹昔從南入以手掩目曰卿何不作于禁而作王肅淹言我捨逆効順欲追蹤陳韓何于禁之有憲亦不對王肅之至也鑾輿行幸肅多扈從勅淹將引若有古跡皆使知之行到朝歌肅問此是何城淹言紂都朝歌肅言故應有殷之頑民淹言昔武王滅紂悉居河洛中因劉石亂華仍隨司馬東度肅知淹寓青州乃笑謂曰青州何必無其遺種淹以肅本隸徐州曰若言青

州本非其地徐州間今日重來非所知也肅遂伏馬上掩口笑顧謂侍御史張思寧曰向卿因戲言遂致辭溺思寧馳馬以聞孝文大悅謂彭城王勰曰淹此段足為制勝輿駕至洛肅因侍宴帝戲肅曰近者行次朝歌聞成淹共卿殊有往復卿試重叙之肅言臣於朝歌失言一之已甚豈宜再說遂皆大笑肅又言淹才詞宜應叙進帝言若因此進淹恐辱卿轉甚肅言臣屈已達人正可顯臣之美帝曰卿為人屈欲求屈已之名復於卿大

優肅言淹既蒙進臣又得屈已伸人此所謂陛下惠而不費遂酣笑而止賜淹龍廐上馬一匹并鞍勒宛具朝服一襲轉謁者僕射時遷都帝以淹家貧給事力送至洛陽使與家累相隨及車駕濟淮勅徵淹淹於路左請見曰敵不可小願聖明保萬全之策伏聞發洛以來諸有諫者皆解官奪職恐非聖明納下之義帝優而容之帝幸徐州勅淹與閭龍駒專主舟楫將汎泗入河沂流還洛軍次碭碭淹以黃河峻急慮有傾危乃上疏陳諫

帝勅淹曰朕以恒代無運漕之路故京邑人貧今移都
伊洛欲通運四方黃河峻急人皆難涉我因此行乘流
所以開百姓之心知卿誠至而不得相納賜驛騾馬一
匹衣冠一襲除羽林監主客于時宮極初構經始務廣
兵民運材日有萬計伊洛流澌苦於厲涉淹遂啓求勅
都水造浮航孝文賞納之意欲榮淹於衆朔旦受朝百
官在位乃賜帛百疋知左右二都水事淹小心畏法典
客十四年四方貢聘皆有私遺毫釐不納至乃衣食不

充遂啓乞外祿景明三年出除平陽太守還朝病卒贈
光州刺史謚曰定子霄字景鸞好為文詠但率多鄙俗
與河東姜質等朋游相好詩賦問答知音之士所共嗤
笑卒治書侍御史

范紹字始孫敦煌龍勒人也少聰敏年十二父命就學
師事崔光以父憂廢業母又誡之曰汝父卒曰令汝遠
就崔生希有成立今已過暮宜遵成命紹還赴學太和
初充太學生轉算生頗涉經史孝文選為門下通事令

史遷錄事掌奏文案帝善之又為侍中李冲黃門崔光所知帝曾謂近臣曰崔光從容范紹之力後朝廷有南討計發河北數州田兵通緣淮戍兵合五萬餘人廣開屯田八座奏紹為西道六州營田大使加步兵校尉紹勤於勸課頻歲大獲又詔與都督中山王英論攻鍾離紹觀其城隍恐不可陷勸令班師英不從紹還具以狀奏聞俄而英敗後歷位并州刺史太常卿莊帝初遇害河陰

劉桃符中山盧奴人也生不識父九歲喪母性恭謹好學舉孝廉射策甲科歷碎職累遷中書舍人以勤明見知久不遷職宣武謂曰揚子雲為黃門頓歷三世卿居此任始十年不足辭也東豫州刺史田益宗居邊貪穢宣武頻詔桃符慰喻之桃符還具稱益宗老耄而諸子非理處物宣武後欲代之恐其背叛拜桃符東豫州刺史與後將軍李世哲領衆襲益宗語在益宗傳桃符善恤蠻左為民吏所懷久之徵還病卒贈洛州刺史

鹿愈字永吉濟陰乘氏人也祖壽興沮渠氏庫部郎父
生再為濟南太守有政績後卒於淮陽太守贈兗州刺
史愈好兵書陰陽釋氏學彭城王勰召為館客嘗詣徐
州馬疲附船入汴夜睡從者上岸竊禾四束飼馬船行
數里愈覺即停船至取禾處以纜三丈置禾束下而反
初為真定公元子直國中尉恒勸以忠廉之節嘗賦五
言詩曰嶧山萬丈樹雕鏤作琵琶由此材高遠絃響謁
中華又曰援琴起何調幽蘭與白雪絲管韻未成莫使

絃響絕子直少有令問愈欲善終故以諷焉後隨子直鎮梁州州有兵糧和糴和糴者靡不潤屋愈獨不取子直彊之終不從孝莊為御史中尉愈兼殿中侍御史監臨淮王或軍時梁遣其豫章王綜據徐州綜密信通或云欲歸款衆議謂不然愈遂請行曰綜若誠心與之盟約如其詐也豈惜一人命乎時徐州始陷邊方騷擾綜部將成景儁胡龍牙並總彊兵內外嚴固愈遂單馬間出徑趣彭城未至之間為綜軍主程兵潤所止問其來

狀念曰我為臨淮王所使兵潤遣人白龍牙等綜既有誠心聞念被執語景儁等曰我每疑元畧規欲叛城將驗虛實且遣左右為元畧使入魏軍中喚彼一人其使果至可令人詐作畧身在一深室託為患狀呼使戶外令人傳語時畧始被梁武追還綜又遣腹心人梁詒迎念密語意狀令善酬答引念詣龍牙所而龍牙語念曰元中山甚欲相見故令喚卿又曰安豐臨淮將少弱卒規復此城容可得乎念曰彭城魏之東鄙勢在必爭可

否在天非人所測龍牙曰當如卿言復詣景儁住所停
愈外門久而未入時夜已久有綜軍主姜桃來與愈言
謂曰元法僧魏之微子拔城歸梁梁主待物有道乃上
指曰今歲星在斗吳之分野君何不歸梁國愈答曰法
僧莒僕之流而梁納之無乃有愧於季孫也今月建鶉
首斗牛受破歲星木也逆而尅之吳國喪敗不久且衣
錦夜遊有識不許言未盡乃引入見景儁景儁良久謂
曰卿不為刺客也答曰今者為使欲反命本朝相刺之

事更卜後圖為設食愈彊飲多食向敵數人微目夸詡
諸人相謂曰壯哉乃引向元畧所一人引入戶指牀令
坐一人別在室中出謂愈曰中山王有教我昔有以向
南且遣相喚欲問卿事晚來患動不獲相見愈遂辭而
退須臾天曉綜軍主范勗景儁司馬楊髡等競問北朝
士馬多少愈陳士馬之盛尋而與梁詒盟契訖末旬綜
降詔封愈定陶縣子除員外散騎常侍永安中為右將
軍給事黃門侍郎進爵為侯雖任居通顯志在謙退迎

送親賓加於疇昔而自無屋宅嘗假賃居止布衣糲食
寒暑不變孝莊嘉其清潔時復賜以錢帛及東徐州城
人呂文欣殺刺史元大賓南引梁人詔愈以使持節散
騎常侍安東將軍為六州大使與行臺樊子鵠討破之
愈又購斬文欣還拜金紫光祿大夫兼尚書右僕射東
南道三徐行臺與都督賀拔勝等拒爾朱仲遠軍敗還
京天平中除梁州刺史時滎陽人鄭勞業反圍州城城
降勞業送愈於關西

張耀字景世自云南陽西鄆人也仕魏累遷步兵校尉
永寧寺塔大興經營務廣靈太后曾幸作所凡有顧問
耀敷陳指畫無所遺闕太后善之後為別將以軍功封
長平男歷岐東荊州刺史天平初遷鄴草創右僕射高
隆之吏部尚書元世儁奏曰南京宮殿毀撤送都連筏
竟河首尾大至自非賢明一人專委受納則恐材木耗
損有闕經構耀清直素著有稱一時臣等將舉為大將
詔從之耀勤於其事尋轉營構左都將興和初加衛大

將軍宮殿成除東徐州刺史卒於州贈司空公謚曰懿
劉道斌武邑灌津人也有器幹腰帶十圍鬚髯甚美初
拜校書郎轉主事頗為孝文所知從征南陽還加積射
將軍給事中帝謂黃門郎邢巒曰道斌是行使異儕流
矣宣武即位遷謁者僕射後歷恒農太守岐州刺史所
在有清貞稱卒於州謚曰康道斌在恒農脩立學館建
孔子廟堂圖畫形像去郡後故吏追思之後立道斌形
於孔像之西而拜謁焉

董紹字興遠新蔡銅陽人也少好學頗有文義起家四
門博士累遷兼中書舍人便於對問為宣武所賞豫州
城人白早生以城南叛詔紹慰勞至上蔡為賊所襲因
送江東梁領軍呂僧珍暫與紹言便相器重梁武帝遣
使勞紹云忠臣孝子不可無之今當聽卿還國紹曰老
母在洛無復方寸既奉恩貸實若更生梁武乃引見之
令其舍人周捨慰勞并稱戰爭多年民物塗炭是以不
恥先言欲與魏朝通好比亦有書都無報旨卿宜備申

此意若欲通好今以宿豫還彼彼當以漢中見歸先是
詔有司以所獲梁將齊狗兒等一人以換紹及還宣武
愍之除給事中紹雖陳說和計朝廷不許累遷右將軍
洛州刺史紹好行小惠頗得人情蕭寶夤反於長安紹
上書求擊之云臣當出瞎巴三千生噉蜀子孝明帝謂
黃門徐紇曰此巴真瞎也紇答此是紹之壯辭云巴人
勁勇見敵無畏懼非實瞎也帝大笑勅紹速行以拒寶
夤之功賞新蔡男仍除梁州刺史時爾朱天光為關右

大行臺啓為大行臺從事兼吏部尚書天光敗賀拔岳
西征復請紹為其開府諮議參軍岳後攜紹於高平牧
馬紹悲而賦詩曰走馬山之阿馬渴飲黃河寧謂胡關
下復聞楚客歌岳死宇文泰亦甚重之及孝武西遷除
御史中丞非其好也鬱鬱不得志或行戲街衢或與少
年游聚不自拘持頗類失性孝武崩宇文泰與百官推
奉文帝上表勸進令呂思禮薛慙作表前後再奏帝猶
執謙冲不許泰曰為文能動至尊者惟董公耳乃命紹

為第三表操筆便成泰曰開進人意不當如此也及登
阼方欲任用之而紹議論朝廷賜死孫嗣

馮元興字子盛東魏郡肥鄉人也少有操尚舉秀才中
尉王顯召為檢校御史遷殿中御史司徒江陽王繼召
為記室參軍遂為元乂所知乂執朝政引為尚書殿中
郎領中書舍人仍御史預聞時事卑身克己人無恨焉
家素貧約食客恒數十人同其饑飽時人歎尚之太保
崔光臨薨薦元興為侍讀尚書賈思伯為侍講授孝明

帝杜氏春秋元興常為摘句儒者榮之義既賜死元興亦被廢乃為浮萍詩以自喻曰有草生碧池無根水上蕩脆弱惡風波危微苦驚浪普泰初為光祿大夫領中書舍人太昌初卒於家贈齊州刺史元興世寒因元義之勢託其交通相用為州主簿論者以為非倫時有濟郡曹昂有學識舉秀才永安中除太學博士兼尚書郎常徒步上省以示清貧忽遇盜大失綾練時人鄙其矯詐

素翻字景翔陳郡項人也父宣為宋青州刺史沈文秀府主簿隨文秀入魏而大將軍劉昶言是其外祖淑近親令與其府諮議參軍素濟為宗宣時孤寒甚相依附及翻兄弟官顯與濟子洸演遂各陵競洸等乃經公府以相排斥翻少入東觀為徐紇所薦李彪引兼著作佐郎參史事後拜尚書殿中郎正始初詔尚書門下於金墉中書外省考論律令翻與門下錄事常景孫紹廷尉監張彪律博士侯堅固書侍御史高綽前將軍邢苗奉

車都尉程靈虬羽林監王元龜尚書郎祖瑩宋世景員
外郎李琰之太樂令公孫崇等並在議限又詔太師彭
城王勰司州牧高陽王雍中書監京兆王愉青州刺史
劉芳左衛將軍元麗兼將作大匠李韶國子祭酒鄭道
昭廷尉少卿王顯等入預其事後除豫州中正是時脩
明堂辟雍翻議謹按明堂之義今古諸儒論之備矣蓋
唐虞以上事難該悉夏殷以降較可知之按周官考工
所記皆記其時事具論夏殷名制豈其紕繆是知明堂

五室三代同焉配帝像行義則明矣及淮南呂氏與月
令同文雖布政班時有堂个之別然推其體則無九室
之徵既而正義殘隱妄說斐然明堂九室著自戴禮探
緒求源罔知所出而漢氏因之自欲為一代之法故鄭
元云周人明堂五室是帝一室也合以五行之數周禮
依數以為之室本制著存是周五室也於今不同是漢
異周也漢為九室畧可知矣但就其此制猶有懵焉何
者張衡東京賦云乃營三宮布教班常複廟重屋八達

九房此乃明堂之文也而薛綜注云房室也謂堂後有九室堂後有九室之制非巨異乎裴頠又云漢氏作四維之个不能令各據其辰就使其像可圖莫能通其居用之禮此為設虛器也甚知漢世徒欲削滅周典捐棄舊章改物創制故不復拘於載籍且鄭元之詁訓三禮及釋五經異義並盡思窮神不墜周公之舊法也伯喈損益漢制章句繁雜既違古背新又不能易元之妙矣魏晉書紀亦有明堂祀五帝之文而不記其經始之制

又無坦然可準觀夫今之基趾猶或髣髴高卑廣狹頗與戴禮不同何得以意抑心便謂九室可明且三雍異所復乖廬蔡之義進退無據何用經通晉朝亦以鑽鑿難明故有一屋之論並非經典正義皆以意妄作茲為不與學家常談不足以範時軌世皇代既乘乾統厯得一御宸自宜稽古則天憲章文武追蹤周孔述而不作豈容虛追子氏放篇之浮說徒損經紀雅誥之遺訓而欲以支離橫議指畫妄圖儀刑宇宙而貽來葉者也又

北京制置求皆允帖繕脩草創以意良多事移化變存者無幾理苟宜草何必仍舊且遷都之始日不遑給先朝規度每事循古是以數年之中煥換非一良以永法為難數改為易何為宮室府庫多因故迹而明堂辟雍獨遵此制建立之辰復未可知矣既猥班訪逮輒輕率瞽言明堂五室請同周制郊建三雍求依故所庶有會經誥無失典刑後議選邊戍事翻議多見施用遭母憂去職熙平初除廷尉少卿頗有不平之論為靈太后所

責出為陽平太守甚不自得遂作思歸賦神龜未遷涼
州刺史時蠕蠕主阿那瓌後主婆羅門並以國亂來降
朝廷問安置之計翻表曰今蠕蠕內為高車所討滅外
憑大國之威靈兩主投身一期而至百姓歸誠萬里相
屬然夷不亂華前鑒無遠覆車在於劉石毀轍固不可
尋今蠕蠕雖主奔於上人散於下而餘黨實繁部落猶
衆高車亦未能一時并兼盡令率附又高車士馬雖衆
主甚愚弱上不制下下不奉上唯以掠盜為資陵奪為

業而河西捍禦疆敵唯涼州敦煌而已涼州土廣人稀糧仗素闕敦煌酒泉空虛尤甚若蠕蠕無復豎立令高車獨擅北垂則西顧之憂匪旦伊夕愚謂蠕蠕二主並宜存之居阿那瓌於東偏處婆羅門於西裔分其降人各有攸屬阿那瓌住所非所經見其中事勢不敢輒陳婆羅門請修西海故城以安處之西海郡本屬涼州今在酒泉直抵張掖西北千二百里去高車所住金山一千餘里正是北虜往來之衝要漢家行軍之舊道土地

沃衍大宜耕植非但今處婆羅門於事為便即可永為
重戍鎮防西北雖外為暑蠕蠕之聲內實防高車之策
一二年後足食足兵斯固安邊保塞之長計也若婆羅
門能自克厲使餘燼歸心收離聚散復興其國者乃漸
令北轉徙度流沙即是我之外藩高車之勍敵西北之
虞何可過慮如其姦回反覆孤恩背德者此不過為逋
逃之寇於我何損今不早圖戒心一啓脫先據西河奪
我嶮要則酒泉張掖自然孤危長河已西終非國有不

圖厥始而求憂其終噬臍之恨悔將何及愚見如允乞遣大使往涼州敦煌及於西海躬行山谷要害之所親閱亭障遠近之宜商量士馬校練糧仗部分見定處置得所入春西海之間即令播種至秋收一年之食使不復勞轉輸之功也且西徼北垂即是大磧野獸所聚千百為群正是蠕蠕射獵之處殖田以自供藉獸以自給彼此相資足以自固今之豫度似如小損歲終大計其利實多高車駸狼之心何可專信假令稱臣致款正可

外加優納而復內備彌深所謂先人有奪人之心者也
時朝議是之還拜吏部郎中遷齊州刺史無多政績孝
昌中除安南將軍中書令領給事黃門侍郎與徐紇俱
在門下並掌文翰翻既才學名重又善附會亦為靈太
后所信待是時蠻賊充斥六軍將親討之翻乃上表諫
止後蕭寶夤大敗於關西翻上表請為西軍死亡將士
舉哀而還者并加賑賚後拜度支尚書尋轉都官翻上
表願以安南尚書換一金紫時天下多事翻雖外請閑

秩而內有求進之心識者怪之於是加撫軍將軍明帝
靈太后曾燕華林園舉觴謂羣臣曰素尚書朕之杜預
欲以此杯敬屬元凱今為盡之侍坐者莫不美仰翻名
位俱重當時賢達咸推與之然獨善其身無所獎拔排
抑後進論者鄙之建義初遇害河陰所著文筆百餘篇
並行於世贈使持節侍中車騎將軍儀同三司青州刺
史嫡子寶首武定中司徒記室參軍事翻弟躍博學有
雋才為車騎將軍太傅清河王懌文學列在文苑傳翻

子聿修出後躍仕齊歷周入隋位望通顯列在齊史躍弟颺卒於豫州冠軍司馬颺弟昇位正員郎颺死後昇通其妻翻恚為之發病昇終不止時人鄙穢之亦於河陰見害贈左將軍齊州刺史

陽尼字景父北平無終人也累世仕於慕容氏尼少好學博通羣籍與上谷侯天護頓邱李彪同志齊名幽州刺史胡泥表薦之徵拜祕書著作郎及改中書學為國子時中書監高潛侍中李冲等以尼碩學舉為國子祭

酒後兼幽州中正孝文臨軒令諸州中正各舉所知尼
與齊州大中正房千秋各舉其子帝曰昔有一祁名垂
徃史今有二奚當聞來牒出為業州平北府長史帶漁
陽太守未拜坐為中正時受鄉人貨免官每自傷曰吾
昔未仕不曾羨人今日失官與本何異然非吾宿志命
也如何既而還家有書數千卷所造字釋數十篇未就
而卒其從孫太學博士承慶撰為字統二十卷行於世
承慶從弟固字敬安性倣儻不拘小節任俠好劍客弗

事生產年二十六始折節好學博覽篇籍有文才太和
中從大將軍宋王劉昶征義陽版府法曹行參軍昶性
嚴暴三軍戰慄無敢言者固啓諫并面陳事宜昶大怒
欲斬之使監當攻道固在軍勇決志意閑雅了無懼色
昶甚奇之軍還言之孝文年三十餘始辟大將軍府參
軍事累遷尚書侍御史多所劾奏宣武廣訪得失固上
讜言表曰當今之務宜早正東儲立師傅以保護立官
司以防衛以係蒼生之心攬權衡親宗室彊幹弱枝以

立萬世之計舉賢良黜不肖使野無遺才朝無素飡孜孜萬機躬勤庶政使人無謗譴之響省徭役薄賦歛脩學官遵舊章貴農桑賤工賈絕談虛窮微之論簡桑門無用之費以救饑寒之苦然後備器械脩甲兵習水戰減吳會撰封禪之禮襲軒唐之軌豈不茂哉初帝委任羣下不甚親覽好桑門之法尚書令高肇以外戚權寵專決朝事又咸陽王禧等並有釁故宗室大臣相見踈薄而王畿人庶勞弊益甚固乃作南北二都賦稱恒代

田漁聲樂侈靡之事節以中京禮儀之式因以諷諫宣
武末中尉王顯起宅既成集寮屬饗宴酒酣問固曰此
宅何如固曰晏嬰湫隘流稱于今豐羨生災著在周易
此蓋同傳舍耳唯有德能卒願公勉之顯嘿然他日又
謂固曰吾作太府卿府庫充實卿以為何如固對曰公
收百官之祿四分之一州郡賊贖悉入京藏以此充府
未足為多且有聚斂之臣寧有盜臣豈不戒歟顯大不
悅以此銜固又有人間固於顯因奏固刺請米麥免固

官遂闔門自守著演蹟賦以明幽微通塞之事又作刺
讒疾嬖幸詩二首以紓其憤明帝即位除尚書考功郎
中奏請諸秀孝考中第者聽叙自固始大軍征硤石勅
為僕射李平行臺七兵郎中平竒固勇敢軍中大事悉
與謀之又命固節度水軍固設竒計先期乘賊獲其外
城後太傅清河王懌舉固除步兵校尉領汝陽王悅郎
中令時悅年少行多不法固上疏諫悅悅甚敬憚之懌
大悅以為舉得其人除洛陽令在縣甚有威風丁母憂

號慕毀瘠杖而後能起練禪之後酒肉不進時固年踰五十而喪過於哀鄉黨親族咸歎服焉清河王懌領太尉辟固從事中郎屬懌被害不奏懌之遇害元乂執政朝野震悚懌諸子及門生寮吏莫不慮禍隱避不出固以嘗被辟命遂獨詣喪所盡哀慟哭良久乃還僕射游擊聞而嘆曰雖欒布王修何以尚也君子哉若人及汝南王悅為太尉選舉多非其人又輕肆撾撻固以前為元卿雖離國猶上疏切諫悅不能用後悅辟固為從事

中郎不就京兆王繼為司徒高選寮佐辟固從事中郎
府解除前將軍又典科揚州勲賞初硤石之役固有先
登之功而朝賞未及至是與尚書令李崇訟勲更相表
崇雖貴盛固據理不撓談者稱焉卒贈輔國將軍太常
少卿謚曰文固剛直雅正不畏彊禦居官清潔家無餘
財終沒之日室徒四壁無以供喪親故為其棺殮初固
著終制一篇務從儉約臨終又勅諸子一遵先制五子
長子休之仕齊周隋自有傳固從兄藻字景德少孤有

雅志涉獵經史位中書博士詔兼禮官拜燕宣王廟於
長安還賜爵魏昌男累遷瀛洲安東府長史以年老歸
家為賊杜洛周所囚發病卒永熙中贈幽州刺史子斐
仕齊位殿中尚書列在齊史

賈思伯字士休齊郡益都人也其先自武威徙焉世父
元壽中書侍郎有學行見稱於時思伯自奉朝請累遷
中書侍郎頗為孝文所知任城王澄之圍鍾離也以思
伯持節為其軍司及澄失利思伯為後殿澄以其儒者

謂之必死及至大喜曰仁者必有勇常謂虛談今於軍
司見之矣思伯託以失道不伐其功時論稱其長者累
遷南青州刺史初思伯與弟思同師事北海陰鳳業竟
無資酬之鳳遂質其衣物時人為之語曰陰生讀書不
免癡不識雙鳳脫人衣及思伯之部送縑百疋遺鳳因
具車馬迎之鳳慙不往時人稱嘆焉昭帝時拜涼州刺
史思伯以邊遠不願辭以男女未婚靈太后不許因舍
人徐紇言乞得停後除廷尉卿自以儒業為素不好法

律希言事俄轉衛尉卿時議建明堂多有同異思伯上
議曰案周禮夏后氏世室殷重屋周明堂皆五室鄭注
云此三者或舉宗廟或舉王寢或舉明堂互言之以明
其制同也若然則夏殷之世已有明堂矣唐虞以前其
事未聞戴德禮記云明堂凡九室十二堂蔡邕云明堂
者天子太廟饗功養老學黜選士皆於其中九室十二
堂案戴德撰記世所不行且九室十二堂其於規制恐
難得厥衷周禮營國左祖右社明堂在國之陽則非天

子太廟明矣然則禮記月令四堂及太室皆謂之廟者
當以天子暫配享五帝故耳又王制云周人養國老於
東膠注云東膠即辟雍在王宮之東又詩大雅云邕邕
在宮肅肅在廟鄭注云宮謂辟雍宮也所以助王養老
則尚和助祭則尚敬又不在明堂之驗矣案孟子云齊
宣王謂孟子曰吾欲毀明堂若明堂是廟則不應有毀
之問其蔡邕論明堂之制云堂方百四十尺象坤之策
屋圓徑二百一十六尺象乾之策方六丈徑九丈象陰

陽九六之數九室以象九州屋高八十一尺象黃鍾九
九之數二十八柱以象宿外廣二十四丈以象氣案此
皆以天地陰陽氣數為法而室獨象九州何也若立五
室以象五行豈不快哉如此蔡邕之論非為通典九室
之言或未可從竊尋考工記雖是補闕之書相承已久
諸儒注述無言非者方之後作不亦優乎其孝經援神
契五經要義舊禮圖皆作五室及徐劉之論謂同考工
者多矣朝廷若獨絕古今自為一代制作者則所願也

若猶祖述舊章規摹前事不應捨殷周成法襲近代妄作且損益之極極於三王後來疑議難可準信鄭元云周人明堂五室是帝各有一室也合於五行之數周禮依數以為室施行于今雖有不同時說然矣尋鄭此論非為無當案月令亦為九室之文原其制置不乖五室其青陽右个即明堂左个明堂右个即總章左个總章右个即元堂左个元堂右个即青陽左个如是則室猶是五而布政十二五室之理謂為可按其方圓高廣自

依時量戴氏九室之言蔡子廟學之議子幹靈臺之說
裴逸一屋之論及諸家紛紜並無取焉學者善其議後
為都官尚書時崔光疾甚表薦思伯侍講中書舍人馮
元興為侍讀思伯遂入授明帝杜氏春秋思伯少時雖
明經從官廢業至是更延儒生夜講晝授性謙和傾身
下士雖在街途停車下馬接誘恂恂曾無倦色客有謂
曰公今貴重寧能不憍思伯曰哀至便憍何常之有當
世以為雅言思伯與元興同事大相友昵元興時為元

又所寵論者譏其趣勢云卒贈青州刺史又贈尚書左僕射謚曰文貞子彥始武定中淮陽太守思伯弟思同字仕明少勵志行雅好經史與兄思伯年少時俱為鄉里所重累遷襄州刺史雖無明察之譽百姓安之元顥之亂思同與廣州刺史鄭光護並不降莊帝還宮封營陵縣男後與國子祭酒韓元熙並為侍講授靜帝杜氏春秋加散騎常侍兼七兵尚書尋拜侍中卒贈尚書右僕射司徒公謚曰文獻初思同為青州別駕清河崔光

韶先為中從事自恃資地恥居其下聞思同還鄉遂便去職州里人物為思同恨之及光韶亡遺誡子姪不聽求贈思同遂表訟光韶操業特蒙贈謚論者歎尚焉思同之侍講也國子博士遼西衛冀隆精服氏學上書難杜氏春秋六十三事思同復駁冀隆乖錯者一十餘條互相是非積成十卷詔下國學集諸儒考之事未竟而思同卒後魏郡姚文安樂陵秦道靜復述思同意冀隆亦尋物故浮陽劉休和又持冀隆說竟未能裁正

祖瑩字元珍范陽道人也曾祖敏仕慕容垂為平原太守道武定中山賜爵安固子拜尚書左丞卒贈并州刺史祖嶷字元達以從征平原功進爵為侯位馮翊太守贈幽州刺史父季真多識前言往行位中書侍郎鉅鹿太守瑩年八歲能誦詩書十二為中書學生好學耽書以夜繼晝父母恐其成疾禁之不能止常密於灰中藏火乃驅逐僮僕父母寢睡之後然火讀書以衣被蔽塞窻戶恐漏光明為家人所覺由是聲譽甚盛內外親屬

呼為聖小兒尤好屬文中書監高允每歎曰此子不器
非諸生所及終當遠至時中書博士張天龍講尚書選
為都講生徒悉集瑩夜讀勞倦不覺失曉催講既切遂
誤持同房生趙郡李怡曲禮卷上座博士嚴毅不敢復
還取仍置曲禮於前誦尚書三篇不遺一字孝文聞之
召入令誦五經章句并陳大義帝嗟賞之瑩出後帝戲
盧昶曰昔流共工於幽州北裔之北那得忽有此子昶
對曰當是才為世生以才名拜太學博士徵署司徒彭

城王總法曹行參軍帝顧謂總曰蕭蹟以王元長為子
良法曹今為汝用祖瑩豈非倫匹也敕令掌總書記瑩
與陳郡袁翻齊名秀出時人為之語曰京師楚楚袁與
祖洛中翩翩祖與袁再遷尚書三公郎中尚書令王肅
曾於省中詠悲平城詩云悲平城驅馬入雲中陰山常
晦雪荒松無罷風彭城王總甚嗟其美欲使肅更詠乃
失語云公可更為誦悲彭城肅因戲總云何意呼悲平
城為悲彭城也總有慙色瑩在座即云亦有悲彭城王

公自未見耳肅曰可為誦之瑩應聲云悲彭城楚歌四
面起屍積石梁亭血流睢水裏肅甚嘆賞之颺亦大悅
退謂瑩曰卿定是神口今日若不得卿幾為吳子所屈
出為冀州鎮東府長史以貨賄事發除名後侍中崔光
舉為國子博士仍領尚書左戶郎李崇為都督北討引
瑩為長史坐截沒軍資除名未幾為散騎侍郎孝昌中
於廣平王第掘得古玉印勅召瑩與黃門侍郎李琰之
辨之瑩云此是于闐國王晉太康中所獻乃以墨塗字

觀之果如瑩言時稱為博物累遷國子祭酒領給事黃
門侍郎幽州大中正監起居事又監議事元顥入洛以
瑩為殿中尚書莊帝還宮坐為顥作詔罪狀爾朱榮免
官後除祕書監中正如故以參議律歷賜爵容城縣子
坐事繫於廷尉會爾朱兆入焚燒樂署鍾石管絃略無
存者勅瑩與錄尚書事長孫承業侍中元孚典造金石
雅樂三載乃就遷車騎大將軍及孝武登阼瑩以太常
行禮封文安縣子天平初將遷鄴齊神武因召瑩議之

以功遷儀同三司進爵為伯薨贈尚書左僕射司徒公
瑩以文學見重常語人云文章湏自出機杼成一家風
骨何能共人同生活也蓋譏世人好偷竊他文以為已
用而瑩之筆札無非天才但不能均調玉石兼有其製
裁之體減於袁常焉性爽俠有節氣士有窮厄以命歸
之必見存拯時亦以此多之其文集行於世子珽襲珽
列在齊史

爾朱榮字天寶壯秀容人也其先居於爾朱川因以為

氏世領部落為首帥高祖羽健登國初為領氏酋長率契胡武士從駕平晉陽定中山論功拜散騎常侍以居秀容川詔割方三百里封之長為世業道武初以南秀容川原沃衍欲令居之羽健曰家世奉國給侍左右秀容既在剗內差近京師豈以沃塿更遷遠地帝許之所居之處曾有狗舐地因而穿之得甘泉焉遂名狗舐泉羽健卒曾祖鬱德祖代勤相繼為領氏酋長代勤太武敬哀皇后舅也既以外親兼數征伐有功給復百年除

立義將軍曾圍山而獵部人射虎誤中其髀代勤仍令
拔箭竟不推問曰此既過誤何忍加罪部內咸感其意
位肆州刺史封梁郡公以老致仕歲賜帛百疋以為常
卒謚曰莊孝莊初追贈太師司徒公錄尚書事父新興
太和中繼為領氏酋長曾行馬羣見一白蛇頭有兩角
遊馬前新興異之謂曰爾若有神令我畜牧蕃息自是
之後日覺滋甚牛羊駝馬色別為羣谷量之朝廷每有
征討即獻私馬兼備資糧助裨軍用孝文嘉之除光祿

大夫及遷洛後特聽冬朝京師夏歸部落每入朝諸王公朝貢競以珍玩遺之新興亦報以名馬位散騎常侍平北將軍秀容第一領氏酋長新興每春秋二時恒與妻子閱畜牧於川澤射獵自娛明帝時以年老求傳爵於榮朝廷許之卒謚曰簡孝莊初贈太師相國西河郡王榮潔白美容貌幼而神機明決及長好射獵每設圍誓衆便為軍陳之法號令嚴肅衆莫敢犯秀容界有池三所在高山之上清深不測相傳曰祈連池魏言天池

也父新興曾與榮游於池上忽聞蕭鼓之音新興謂榮曰古老相傳聞此聲皆至公輔吾今年已衰暮當為汝耳榮襲爵後除直寢游擊將軍正光中四方兵起遂散畜牧招合義勇以討賊功進封博陵郡公其梁郡前爵聽賜第二子時榮率衆至肆州刺史尉慶賓惡之閉城不納榮怒攻拔之乃署其從叔羽生為刺史執慶賓還秀容自是兵威日盛朝廷亦不能罪鮮于修禮之反榮表求東討除征東將軍都督并肆等州軍事及葛榮吞

杜洛周兵凶轉甚榮恐其南逼鄴城表求東援相州明
帝不許榮以山東賊盛慮其西逸乃遣兵守溢口上書
陳情願擊葛榮於是遂勒部曲廣召義勇北捍馬邑東
塞井陘尋屬明帝崩事出倉卒榮聞之大怒謂鄭儼徐
紇為之與元天穆等密議稱兵入匡朝廷計定乃抗表
云今海內草草異口一言皆云大行皇帝鳩毒致禍舉
潘嬪之女以誑百姓奉未言之兒而臨四海社稷危於
累卵臣請赴闕收徐鄭之徒雪天下之恥更召宗親推

其明德遂勒所統赴京師靈太后甚懼詔以李神軌為大都督將兵於大行杜防榮抗表之始遣從子天光親信奚毅及蒼頭王相入洛與從弟世隆密議廢立天光乃見莊帝具論榮心帝許之天光等還比榮發晉陽猶疑所立乃以銅鑄孝文及咸陽王禧等五王子孫像成者當奉為主唯莊帝獨就師次河內重遣王相密來迎莊帝與帝兄彭城王劭弟霸城公子正武泰元年四月莊帝於高渚潛渡至榮軍將士咸稱萬歲十一日莊帝

即位詔以榮為使持節都督中外諸軍事大將軍開府
兼尚書令領軍將軍領左右太原王及度河太后乃下
髮入道十二日內外百官皆朝於行宮十三日榮感武
衛將軍費穆之言謂天下乘機可取乃譎朝士共為盟
誓將向河陰西北三里至南北長隄悉令下馬西度云
欲祭天朝士既集列騎圍遶妄言丞相高陽王欲反且
責以天下喪亂明帝卒崩之由云皆緣此等貪虐不相
輔弼所致因縱兵亂害王公卿士皆斂手就戮死者一

千三百人又命二十三人拔刀走行宮莊帝及彭城王
霸城公俱出帳榮先遣并州人郭羅察共西部高車叱
列殺鬼在帝左右相與為應及見事起假言防衛抱帝
入帳餘人即害彭城王霸城公乃令四五十人遷帝於
河橋沈靈太后及少主於河時又有朝士百餘人後至
仍於隄東被圍遂臨以白刃唱云能為禪文者出當原
其命時有隴西李神雋頓邱李諧太原溫子昇並當世
辭人皆在圍中恥是從命俯伏不應有御史趙元則者

恐不免死出作禪文榮令人誡軍士言元氏既滅爾朱氏興其衆咸稱萬歲榮遂鑄金為己像數四不成時幽州人劉靈助善卜為榮所信占言今天時人事未可榮乃曰若我不可天穆如何靈助曰天穆亦不吉惟長樂王有王兆耳榮亦精神恍惚不自支持久而方悟遂便愧悔至四更中乃迎莊帝望馬首叩頭請死其士馬三千餘騎既濫殺朝士乃不敢入京師欲向北為移都之計持疑經日始奉駕還洛陽及上北芒視城闕復懷畏

欽定四庫全書

通志

卷一百五十一

四元

懼不肯更前武衛將軍汎禮苦執不聽復前入城不朝其北來之人皆乘馬入殿諸貴死散無復次序莊帝左右唯有故舊數人榮猶執移都之議上亦無以拒焉又在明光殿重謝河橋之事誓言無復二心莊帝自起止之因復為榮誓言無疑心榮喜因求酒一遍及醉熟帝欲誅之左右苦諫乃止即以牀輦向中常侍省榮夜半方寤遂達旦不眠自此不復宿禁中矣榮女先為明帝嬪欲上立為后帝疑未決給事黃門郎祖瑩曰昔文公

入秦懷嬴入侍事有反經合義陛下獨何疑焉上遂從之榮意甚悅于時人間或云榮欲遷都晉陽或云欲肆兵大掠迭相驚恐人情震駭京邑士庶十不一存率皆逃竄無敢出者直衛空虛官府廢曠榮聞之上書謝憊帝之即位也榮啓帝封彭城王劭為無上王至是請追尊無上王帝號諸王刺史乞贈三司其位班三品請贈令僕五品之官各贈方伯六品已下及白身贈以鎮郡諸死者無後聽繼即授封爵均其高下節級別科使恩

洽存亡有慰生死詔如所表又啓帝遣使巡城勞問於是人情遂安朝士逃亡者亦稍歸闕榮又奏請番直朔望之日引見三公令僕尚書九卿及司州牧河南尹洛陽河陰執事之官參論國政以為常式五月榮還晉陽乃令元天穆留京為侍中太尉公錄尚書事京畿大都督兼領軍將軍封上黨王樹置腹心布在列職舉止所為皆由其意七月詔加榮柱國大將軍時葛榮將向京師衆號百萬相州刺史李神雋閉門自守九月榮上表

討之乃率精騎七千馬皆有副倍道兼行東出滏口葛
榮為賊久橫行河北時衆寡非敵議者謂無制賊之理
葛榮聞之喜見於色乃令其衆為長繩至便縛取自鄴
以北列陣數十里箕張而進榮潛軍山谷為奇兵分督
將已上三人為一處處有數百騎令所在揚塵鼓譟使
賊不測多少又以人馬逼戰刀不如棒密勒軍士馬上
各齎袖棒一枚置於馬側至於戰時慮廢騰逐不聽斬
級使以棒棒之而已乃分命壯勇所當衝突號令嚴明

將士同奮榮身自陷陣出於賊後表裏合擊大破之於陣禽葛榮餘衆悉降榮以賊徒既衆若即分割恐其疑懼或更結聚乃普令各從所樂親屬相隨任所居止於是羣情喜悅登即四散數十萬衆一朝散盡待出百里之外乃始分道領押隨便安置咸得其所擢其渠帥隨才授用新附者咸安時人服其處分機速乃檻車送葛榮赴闕詔加榮大丞相都督河北畿外諸軍事初榮之將討葛榮也軍次襄垣遂大獵有雙兔起於馬前榮乃

躍馬彎弓而誓之曰中之則禽葛榮不中則否既而並
應弦而殪三軍咸悅及破賊之後即命立碑於其所號
雙兔碑榮將戰之夜夢一人從葛榮索千牛刀葛榮初
不肯與此人自稱我是道武皇帝汝何敢違葛榮乃奉
刀此人手持授榮榮既寤而喜自知必勝又詔以冀州
之長樂相州之南趙定州之博陵滄州之浮陽平州之
遼西燕州之上谷幽州之漁陽七郡各萬戶通前滿十
萬為太原國邑又進位太師建義初北海王元顥南奔

梁梁立為魏主資以兵將時邢杲寇亂三齊與顓應接朝廷以顓孤弱不以為慮永安二年春詔元天穆先平齊地然後迴師征顓顓以大將未還乘虛徑進既陷梁國鼓行而西滎陽虎牢皆不守五月車駕出幸河北事出不虞滎聞之馳傳朝行宮於上黨之長子輿駕於是南轅滎為前驅旬日間兵馬大集天穆克平邢杲亦度河以會車駕遂幸河內滎與顓相持於河上無船不得即渡議欲還北更圖後舉黃門郎楊侃高道穆等並固

執以為不可屬馬渚諸楊云有小船數艘求為鄉導榮
乃令都督爾朱兆等率精騎夜濟顥率麾下南走車駕
度河入居華林園詔榮加天柱大將軍此官雖訪古無
聞太祖以前曾置此號增封通前二十萬戶加前後部
羽葆鼓吹榮尋還晉陽遙制朝廷親戚腹心皆補要職
百寮朝廷動靜莫不以申至於除授皆須榮許然後得
用莊帝雖受制權臣而勤於政事朝夕省納孜孜不已
數自理冤獄親覽辭訟又以選司多濫與吏部尚書李

神僞議正綱紀而榮乃大相嫌責曾闕補定州曲陽縣令神僞以階縣不奏別更擬人榮大怒即遣其所補者往奪其任榮使入京雖或微蔑朝廷見之莫不傾靡及至闕下未得通奏恃榮威勢至乃忿怒神僞遂上表遜位榮欲用其從弟世隆攝選上亦不違榮曾啓北人為河南諸州欲為掎角勢上不即從天穆入見論事上猶未許天穆曰天柱既有大功為國宰相若請普代天下官屬恐陛下亦不得違之如何啓數人為州便停不用

帝正色曰天柱若不為人臣朕亦湏代如其猶存臣節
無代天下百官理榮聞之大怒曰天子由誰得立今乃
不用我語又榮女為皇后復嫌內妃嬪甚有妬恨之事
帝遣世隆語以大理后曰天子由我家置立今便如此
我父本日即自作今亦復決世隆曰兄止自不為若本
自作臣今亦得封王莊帝既外迫於榮內迫於后怏怏
不悅不以萬乘為貴先是葛榮枝黨韓婁仍據幽平二
州榮遣都督侯深討斬之時万俟醜奴蕭寶夤擁眾幽

涇榮遣其從子天光為雍州刺史令率都督賀拔岳侯
莫陳悅等入關討之天光至雍州以衆少未進榮大怒
遣其騎兵參軍劉貴馳驛詣軍加天光杖罰天光等大
懼乃進討連破之禽醜奴寶劬並檻車送關天光又禽
王慶雲万俟道洛關中悉平於是天下大難便盡莊帝
恒不慮外寇唯恐榮為逆當時諸方未定欲使與之相
持及告捷之日乃不甚喜謂尚書令臨淮王彧曰即今
天下便是無賊彧見帝色不悅曰臣恐賊平以後方勞

聖慮帝畏餘人怪還以他語解之曰其實撫寧荒餘彌成不易榮性好射獵不捨寒暑法禁嚴酷若一鹿出乃有數人殞命曾有一人見猛虎便走榮謂曰欲求活邪即斬之自此獵時如登戰場列圍而進必須齊一雖遇險阻不得迴避其下甚苦之曾見一猛虎在窮谷中乃令餘人重衣空手搏之不令復損於是數人被殺遂禽得之持此為樂焉太宰元天穆從容謂榮曰大王勲濟天下四方無事唯宜調政養民順時蒐狩何必盛夏馳

逐傷犯和氣榮便攘肘謂天穆曰太后女主不能自正
推奉天子者此是人臣常節葛榮之徒本是奴才乘時
作亂譬如奴走禽獲便休頃來受國大寵未能開拓境
土混一天下何宜今日便言勲也如聞朝士猶自寬縱
今秋欲共兄戒勒士馬校獵嵩原令貪汚朝貴入圍搏
虎仍出魯陽歷三荆悉擁生蠻北填六鎮廻軍之際因
平汾胡明年簡練精騎分出江淮蕭衍若降乞萬戶侯
如不降徑度數千騎便往縛取待六合寧一八表無塵

然後共兄奉天子巡四方觀風俗布政教如此乃可稱
勲耳今若止獵兵士懈怠安可復用也榮見四方無事
乃遣人奏曰參軍許周勸臣取九錫臣惡其此言已發
遣令去榮時頗望得殊禮故以意諷朝廷帝實不欲與
之因稱其忠榮見帝年長明悟為衆所歸欲移自近皆
使由已每因醉云入將天子拜謁金陵後還復恒朔而
侍中朱元龍輒從尚書索太和中遷京故事於是復有
移都消息榮乃暫來向京言看皇后晚難帝憊河陰之

事終恐難保乃與城陽王徽侍中楊侃李或尚書右僕射元羅謀皆勸帝刺殺之惟膠東侯李侃晞濟陰王暉業言榮若來必有備恐不可圖又欲殺其黨與發兵拒之帝疑未定而京師人懷憂懼中書侍郎邢子才之徒至避之東出榮乃徧與朝士書相任留中書舍人溫子昇以書陳帝帝恒望其不來及見書以榮必來色甚不悅武衛將軍奚毅建義初往來通命帝每期之甚重然以為榮通親不敢與之言情毅曰若必有變臣寧死陛

下難不能事契胡帝曰朕保天柱無異心亦不忘鄉忠
款三年八月榮將四五千騎發并州向京時人皆言其
反復道天子必應圖之九月初榮至京有人告云帝欲
圖之榮即具奏帝曰外人亦言王欲害我豈可信之於
是榮不自疑每入謁帝從人不過數十皆挺身不持兵
仗帝欲止城陽王徽曰縱不反亦何可耐況何可保邪
又北人語訛語爾朱為人主又聞其在北言我姓人主
先是長星出中台埽大角恒州人高榮祖頗知天文榮

問之曰是何祥也答曰除舊布新象也昔長星埽大角
秦以之亡榮聞之悅又榮下行臺郎中李顯和曾曰天
柱至那無九錫安湏王自索也亦是天子不見機都督
郭羅察曰今年真可作禪文何但九錫參軍褚光曰人
言并州城上有紫氣何慮天柱不應榮下人皆陵侮帝
左右無所忌憚其事皆上聞奚殺又求見帝間即下明
光殿與語帝又疑其為榮不告以情及知殺赤誠乃召
城陽王徽及楊侃李彥告以殺語榮小女嫁與帝兄子

陳留王小字伽邪榮嘗指之曰我終得此女壻力徽又云榮慮陛下終為已患脫有東宮必貪立孩幼若皇后不生太子則立陳留以安天下并言榮指陳留語狀帝既有圖榮意夜夢手持一刀自害落十指節都不覺痛惡之以告城陽王徽及楊侃徽解夢曰蝮蛇螫手壯士解腕割指節與解腕何異去患乃是吉祥聞者皆言善九月十五日榮天穆到京輿駕迎之榮與天穆並從入西林園讌射乃奏曰近來侍官皆不習武事陛下宜將

五百騎出獵因省辭訟先是奚毅言榮因獵挾天子移都至是其言相符至十八日召中書舍人溫子昇告以殺榮狀并問以殺董卓事子昇具通本上曰王允若即赦涼州人必不應至此良久語子昇曰朕之情理卿所具知死猶須為況必不死朕寧與高貴鄉公同日而死不與常道鄉公同日而生上謂殺榮天穆即赦其黨便應不動應詔王道習曰爾朱世隆司馬子如朱元龍比來偏被委付具知天下虛實謂不宜留城陽王及楊侃

曰若世隆不全仲遠天光豈有來理帝亦謂然無復殺意城陽王曰榮數征伐腰間有刀或能狼戾傷人臨事願陛下出乃伏侃等十餘人於明光殿東其日榮與天穆並入坐食未訖起出侃等從東階上殿見榮天穆出至中庭事不果十九日是帝忌日二十日榮忌日二十一日暫入即向陳留王家飲酒極醉遂言病動頻日不入上謀頗泄世隆等以告榮榮輕帝不謂能反預帝謀者皆懼二十五日旦榮天穆同入其日大欲草易上在

明光殿東序中西面坐榮與天穆並御牀西北小牀上南坐城陽王入始一拜榮見光祿卿魯安等持刀從東戶入即馳向御坐帝拔千牛刀手斬之時年三十八得其手版上有數牒啓皆左右去留人名非其腹心悉在出限帝曰豎子若過今日便不可制矣時元天穆與榮子菩提並就戮於是內外喜叫聲滿京城既而大赦榮雖威名大振而舉止輕脫止以馳射為伎藝每入朝見更無所為唯戲上下馬於西林園宴射恒請皇后出觀

并召王公妃主共在一堂每見天子射中輒自起舞叫
將相卿士悉皆盤旋乃至妃主婦人亦不免隨之舉袂
及酣酒耳熱必自匡坐唱歌為樹梨普梨之曲見臨
淮王或從容閑雅愛尚風素固令為勅勒舞日暮罷歸
便與左右連手蹋地唱迴波樂而出性甚嚴暴愠喜無
恒弓箭刀槊不離於手每有瞋嫌即行忍害左右恒有
死憂曾欲出獵有人訴之披陳不已發怒即射殺之曾
見沙彌重騎一馬榮即令相觸力窮不復能動遂使傍

人以頭相擊死而後已節閔帝初世隆等得志乃詔贈假黃鉞相國錄尚書都督中外諸軍事晉王加九錫給九旒鑾輅虎賁班劍三百人輜輶車準晉太宰安平獻王故事謚曰武又詔百官議榮配饗司直劉季明曰晉王若配永安則不能終臣節以此論之無所配世隆作色曰卿合配季明曰下官預在議限據理而言不合上心誅翦唯命衆為之危季明自若世隆意不已乃配享孝文廟庭菩提位太常卿開府儀同三司侍中特進死

時年十四節閔帝初加贈司徒謚曰惠菩提弟又羅武
衛將軍梁郡王尋卒贈司空公又羅弟文殊封平昌郡
王孝靜初轉潁滎潁太原王薨於晉陽時年九歲文殊
弟文暢初封昌樂郡公以滎破葛賊之勲進爵為王其
姊孝莊帝皇后及韓陵之敗齊神武納之待其家甚厚
文暢由是拜開府儀同三司肆州刺史家富於財招致
賓客窮極豪侈與丞相司馬任胄主簿李世林都督鄭
仲禮房子遠等相狎外示盃酒交而潛謀害齊神武自

魏氏舊俗以正月十五日夜為打簇戲能中者即時賞帛帛令仲禮藏刀於袴中因神武臨觀謀竊發事捷共奉文暢為任氏家客薛季孝所告以姊寵止坐文暢一房文暢死時年十八弟文略以次兄又羅卒無後襲又羅爵梁郡王坐文暢事當誅靜帝使人往晉陽欲拉殺之神武特加寬貸奏免之文略聰明雋爽多所通習文襄嘗令章永興馬上彈琵琶奏十餘曲試使文略寫之遂得其八文襄戲之曰聰明人多不老壽梁郡其慎之

文略對曰命之脩短皆在明公文襄愴然曰此不足慮
初神武遺令恕文略十死恃此益橫多所陵忽天保末
嘗邀平秦武興汝南諸王至宅供設奢麗各有贈賄諸
王共假聚寶物以要之文略弊衣而往從奴五十人皆
駿馬侯服其豪縱不遜如此平秦王有七百里馬文略
敵以好婢賭取之明日平秦王使人致請文略殺馬及
婢以銀器盛婢頭馬肉而遺之平秦王訴之於文宣繫
於京畿獄文略彈琵琶吹橫笛謠詠倦極便卧唱挽歌

居數月奪防者弓矢以射人曰不然天子不憶我有司
奏遂伏誅文略嘗大遺魏收金請為其父作佳傳收論
榮比韓彭伊霍蓋由是也榮從子兆字萬仁少善騎射
兼有膂力躡捷過人數從榮遊獵至於窮巖絕澗人所
不升降者兆必先之手格猛虎無所疑避榮以此特加
賞愛任為爪牙榮曾送臺使見二鹿授兆二箭令取供
今食遂構火以待之俄而兆獲其一榮欲誇使人責兆
不盡取杖之五十榮之入洛兆遷武衛將軍為前鋒都

督孝莊即位封潁川郡公後從上黨王元天穆平邢杲
及元顥屯於河橋榮遣兆與賀拔勝自馬渚西渡罷禽
顥子冠受進破安豐王延明顥於是退走莊帝還宮論
功除車騎大將軍儀同三司汾州刺史爾朱榮死兆自
汾州率衆據晉陽元暕立授兆大將軍進爵為王兆與
世隆等定謀攻洛兆遂擁兵南出輕兵倍道掩襲京邑
先是河邊人夢神謂已曰爾朱家欲度河用爾作湍波
津令為之縮水脉月餘夢者死及兆至有行人自言知

水淺處以草徃徃表插而導焉忽失其所在兆遂策馬
涉渡是日暴風鼓怒黃塵張天騎叩宮門宿衛方覺鷹
弓欲射袍撥絃矢不得發一時散走莊帝步出雲龍門
外為兆騎所繫幽於永寧佛寺兆撲殺皇子汙辱妃嬪
縱兵虜掠停洛旬日先令衛送莊帝於晉陽兆後於河
梁監閱財寶初兆將向洛也遣使招齊神武欲與同舉
神武時為晉州刺史謂長史孫騰曰臣而伐君其逆已
甚我今不徃彼必致恨卿可徃申吾意但云山蜀未平

今方攻討不可委之而去騰乃詣兆及於并州大谷具
申神武言兆不悅曰還白高兄弟有吉夢今行必克吾
比夢吾父登高堆堆傍地悉耕熟唯有馬藟草株往往
猶在吾父顧我今下拔之吾手所至無不盡出以此而
言往必有利騰還具報之神武曰兆猖狂舉兵犯順吾
勢不可更事爾朱也兆今南行天子列兵河上兆進不
能渡退不得還吾乘山東下出其不意此徒可一舉而
禽俄而兆克京師孝莊幽繫都督尉景從兆南行以書

報神武神武得書大驚召騰示之曰卿可馳駟詣兆以示謁賀密觀天子今在何處吾當於路邀迎唱大義於天下騰遇帝於中路神武時率騎東轉聞帝已渡河於是西還仍與兆書具陳禍福言不宜害天子受惡名於海內兆怒不納帝遂暴崩初榮旣死莊帝詔河西人統豆陵步蕃等令嚴秀容兆入洛後步蕃兵勢甚盛南逼晉陽兆所以不暇留洛迴師禦之頻為步蕃所敗於是部勒士馬謀出山東令人徵神武神武晉州僚屬並勸

不行神武揣其勢迫必無他慮乃決策赴之兆素服神
武威略分三州六鎮之人令神武統領神武既分兵別
營乃引兵南出避步蕃之銳步蕃至樂平郡神武與兆
還討之斬之於秀容石鼓山兆還晉陽及節閔帝立授
兆使持節侍中都督中外諸軍事柱國大將軍兼錄尚
書事大行臺又以兆為天柱大將軍兆謂人曰此是叔
父終官我何敢受固辭不拜尋加都督十州諸軍事世
襲并州刺史神武之克殷州也兆與仲遠度律約拒之

仲遠度律次於陽平兆次於廣阿衆號十萬神武縱反
間於是兩不相信各致猜疑徘徊不進仲遠等頻使斛
斯椿賀拔勝往諭之兆輕騎三百來就仲遠同坐幕下
兆性麤獷意色不平手舞馬鞭長嘯凝望深疑仲遠等
有變遂趨出馳還仲遠遣椿勝等追而曉譬兆遂拘縛
將還經日放遣仲遠等於是奔退神武乃進擊兆軍大
敗兆與仲遠度律遂相疑阻久而不和世隆請節閔帝
納兆女為皇后兆乃大喜世隆謀抗神武乃降辭厚禮

喻兆赴洛兆與天光度律更自信約然後大會於韓陵
山戰敗復奔晉陽其年秋神武自鄴進討之兆遂大掠
并州走於秀容神武又追擊度赤洪嶺破之衆亦降兆
竄於窮山殺所乘馬自縊於樹神武收而葬之兆勇於
戰鬪而無將領之能榮雖奇其膽決然每云兆不過將
三千騎多則亂矣兆弟智彪節閔帝封為安定王與兆
俱走神武禽之後死於晉陽榮從弟彥伯祖侯真文成
時并安二州刺史始昌侯父買珍宣武時武衛將軍華

州刺史彥伯性和厚永安中為榮府長史節閔帝潛嘿
於龍華佛寺彥伯敦喻往來尤有勤款帝既立爾朱兆
以已不豫謀大為忿恚將攻世隆詔令華山王鷲慰兆
兆猶不釋世隆復令彥伯自往喻之兆乃止及還帝譙
彥伯於顯陽殿時侍中源子恭黃門郎竇瑗並侍坐彥
伯曰源侍中比為都督與臣相持於河內當爾之時旗
鼓相望眇如天隔寧期同事陛下為今日之忻也子恭
曰崩通有言犬吠非其主他日之事永安猶今日之事

陸下耳帝曰源侍中可謂有射鉤之心也遂令二人極
醉而罷後封博陵郡王位司徒公于時炎早有勸彥伯
解司徒者乃上表遜位詔許之俄除儀同三司侍中餘
如故彥伯於兄弟之中差無過患天光等敗於韓陵彥
伯欲領兵屯河橋世隆不從及張勸等掩襲世隆彥伯
時在禁直長孫承業等啓陳神武義功既振將除爾朱
節閔令舍人郭崇報彥伯知彥伯狼狽出走為人所執
尋與世隆同斬於閭闔門外縣首於斛斯椿門樹傳於

神武先是洛中謠曰三月末四月初揚灰毆土覓真珠
又曰頭去項脚根齊驅上樹不須梯至是並驗子敞逃
匿得免仕周歷隋列在隋史彥伯弟仲遠頗知書計明
帝末年爾朱榮兵威稍盛諸有啓謁率多見從而仲遠
摹寫榮書又刻榮印與尚書令史通為姦詐造榮啓表
請人為官大得財貨以資酒色落魄無行業及孝莊即
位封清河公累遷車騎將軍徐州刺史兼尚書僕射三
徐大行臺尋進督三徐諸軍事仲遠上言竊見比來行

臺采募者皆得權立中正在軍定第斟酌授官今求兼
置權濟軍要若立第亦爽關京之日任有司裁奪詔從
之於是隨情補授肆意聚斂爾朱榮死仲遠勒其部衆
來向京師陷沒西平莊帝詔諸將駱驛進討並為仲遠
所敗尋爾朱兆入洛節閔帝立進爵彭城王加大將軍
又兼尚書令鎮大梁仲遠遣使請準朝式在軍鳴騶節
閔帝覽啓笑而許之其肆情如此復進督東道諸軍事
本將軍兗州刺史餘如故仲遠天性貪暴心如峻壑大

宗富族誣之以反歿其家口簿籍財物皆以入已丈夫死者投之河流如此者不可勝數諸將婦有美色者莫不被其淫亂自滎陽以東輸稅悉入其軍不送京師時天光控關右仲遠在大梁兆據并州世隆居京邑各自專恣權彊莫比焉所在並以貪虐為事於是四方解體又加太宰解大行臺仲遠專恣尤劇方之彥伯世隆最為無禮東南牧守下至民俗比之豺狼特為患害後移屯東郡率衆與度律等拒齊神武爾朱兆領騎數千自

晉陽來會軍次陽平神武縱以間說仲遠等迭相猜貳
狼狽遁走中興二年復與天光等於韓陵戰敗南走乃
奔梁死於江南仲遠弟世隆字榮宗明帝末兼直閣加
前將軍爾朱榮表請入朝靈太后惡之令世隆詣晉陽
慰喻榮榮因欲留之世隆曰朝廷疑兄故令世隆來今
遂住便有內備非計之善榮乃遣入朝榮舉兵南出世
隆遂走會榮於上黨建義初除給事黃門侍郎莊帝之
立世隆預其謀封樂平郡公元顥逼大梁詔為前將軍

都督鎮虎牢顯既克滎陽世隆懼而遁還莊帝倉卒北
巡及車駕還宮除尚書左僕射攝選莊帝之將圖爾朱
榮每屏人言世隆懼變乃為匿名書自榜其門曰天子
與侍中楊侃黃門高道穆為計欲殺天柱還復自以此
書與榮妻北鄉郡公主并以呈榮勸其不入榮毀書唾
地曰世隆無膽誰敢生心世隆又勸其速發榮曰何忽
忽皆不見從榮死世隆奉榮妻燒西陽門夜走北次河
橋殺武衛將軍奚毅率衆還戰大夏門外及李苗燒絕

河梁世隆乃北遁攻建州克之盡殺人以肆其忿至長子與度律等共推長廣王曄為主曄小名盆子聞者皆以事類赤眉曄以世隆為尚書令封樂平郡王加太傅行司州牧會兆於河陽兆既平京邑讓世隆曰叔父在朝多時耳目應廣如何今天柱受禍案劔嗔目詞色甚厲世隆遜辭拜謝然後得已而深恨之時仲遠亦自滑臺入京世隆與兄弟密謀慮元曄母干豫朝政伺其母衛氏出行遣數十騎如劫賊於京巷殺之公私驚愕莫

識所由尋縣牒以千萬錢募賊百姓知之莫不喪氣又以曄疎遠欲推立節閔帝而度律意在南陽王乃曰廣陵不言何以主天下後知能語遂行廢立初世隆之為僕射尚書文簿在家省閔性聰解又畏榮深自克勉留心几案傍接賓客遂有解了之名榮死之後無所顧憚及為令常使尚書郎宋游道邢昕在其宅聽事東西別座受納訴訟稱命施行既總朝政生殺自由公行淫泆信任羣小隨情與奪又兄弟羣從各擁彊兵割剝四海

極其貪虐姦諂蛆酷多見信用溫良名士罕豫腹心於是天下之人莫不厭毒世隆尋讓太傅節閔特置儀同三司之官位次上公之下以世隆為之贈其父買珍相國錄尚書事大司馬及齊神武起義兵仲遠度律等愚戇恃彊不以為慮而世隆獨深憂恐及天光等敗於韓陵世隆請赦天下節閔不許斛斯椿據河橋盡殺世隆黨附令行臺長孫承業詣闕奏狀掩執世隆及兄彥伯俱斬之初世隆曾與吏部尚書元世儁握槊忽聞局上

設然有聲一局子盡倒立世隆甚惡之又曾晝寢其妻
奚氏忽見一人持世隆首去奚氏驚就視而世隆寢如
故既覺謂妻曰向夢人斷我頭持去意殊不適又此年
正月晦日令僕並不出省西門不開忽有河內太守田
帖家奴告省門亭長云今旦為令王借車牛一乘終日
於洛濱游觀至晚王還省將車出東掖門始覺車上無
褥請為記識亭長以令僕不上西門不開無跡入者此
奴固陳不已公文列訴尚書都令史謝遠疑謂妄有假

借白世隆付曹推驗時都官郎中穆子容究之奴言初
來時至司空府西欲向省令王嫌遲遣催車車入到省
西門王嫌牛小繫於闕下槐樹更將一青牛駕車王著
白紗高頂帽短小黑色儻從皆裙襦袴褶握版不似常
時服章遂遣一吏將奴送入省中聽事東闕內東廂第
一屋中其屋先常閉奴云入此屋中有版牀牀上無席
大有塵上兼有甕米奴拂牀坐兼畫地戲甕中米亦握
看之子容與謝遠看之閉極久全無開跡及入狀皆符

同具以對世隆世隆悵然意以為惡未幾見誅世隆弟
世承莊帝時位侍中領御史中尉人才猥劣備員而已
及元顥內逼世承守輶轅為顥所禽顥讓而竊之莊帝
還宮贈司徒世承弟弼字輔伯節閔帝時封河間郡公
尋為青州刺史韓陵之敗欲奔梁數日與左右割臂為
約弼帳下都督馮紹隆為弼信待乃說弼曰今方同契
闊宜當心瀝血示衆以信弼從之大集部下弼乃踞胡
牀令紹隆持刀披心紹隆因推刃殺之傳首京師榮從

父弟度律鄙朴少言莊帝初封樂鄉縣伯榮死與世隆
赴晉陽元暉之立以度律為太尉公四面大都督封恒
山王與爾朱兆入洛兆還晉陽留度律鎮京師節閔帝
時為使持節侍中大將軍太尉公兼尚書令東北道行
臺與仲遠出拒義旗齊神武聞之與爾朱兆遂相疑貳
自敗而還度律雖在軍戎聚斂無厭所經為百姓患毒
其母山氏聞度律敗遂恚憤發病及至母責之曰汝荷
國恩無狀而反我何忍見他屠戮汝也言終而卒時人

怪異之後韓陵之敗斛斯椿先據河橋遂西走灋波津
為人執送椿囚之送齊神武斬之都市榮從祖兄子天
光少勇決榮特親愛之常預軍戎謀孝昌末榮據并肆
仍以天光為都督總統肆州兵馬明帝崩榮向京師委
以後事建義初為肆州刺史封長安縣公榮將討葛榮
留天光在州鎮其根本謂曰我身不得至處非汝無以
稱我心永安中與元天穆東破邢杲元顥入洛天光與
天穆會榮於河內榮發後并肆不安詔天光兼尚書僕

射為并肆等九州行臺仍行并州事天光至并州部分
約勒所在寧輯顓破還京師改封廣宗郡公初高平鎮
城人赫連恩等為逆共推勅勒酋長胡琛為主號高平
王遙臣沃野鎮賊帥破六韓忸蚿琛入據高平城遣其
大將万俟醜奴來寇涇州琛後與莫折念生交通侮慢
忸蚿遣使人費律如至高平誘斬琛為醜奴所并與蕭
寶夤相拒於安定寶夤敗還建義元年夏醜奴擊寶夤
於靈州禽之遂僭大號時獲西北貢師子因稱神獸元

年置百官朝廷憂之乃除天光使持節都督雍州刺史率大都督武衛將軍賀拔岳大都督侯莫陳悅等討醜奴天光初行唯有軍士千人時東雍赤水蜀賊斷路天光入關擊破之簡取壯健至雍又稅人馬合得萬匹以軍人寡少停留未進榮遣責之杖天光百下榮復遣軍士二十人赴天光天光令賀拔岳率千騎先驅至岐州禽其行臺尉遲菩薩醜奴棄岐州走還長安天光發雍至岐與岳合勢破醜奴獲蕭寶夤於是涇豳二夏北至

靈州及賊黨結聚之類並降唯賊行臺万俟道洛不下
率衆西依牽屯山據嶮自守榮責天光不獲道洛復遣
使杖之百詔削爵為侯天光與岳悅等復向牽屯討之
道洛戰敗投略陽賊帥王慶雲慶雲以道洛驍果絕倫
得之甚喜便謂大事可圖乃自稱皇帝以道洛為大將
軍天光乃入隴至慶雲所居永洛城破其東城賊遂併
趣西城城中無水衆聚熱渴有人走降言慶雲道洛欲
突出天光恐失賊帥乃遣謂慶雲可以早降若未決當

聽諸人今夜共議又謂曰相知須水今為小退賊衆安
悅無復走心天光密使軍人多作木槍各長七尺至昏
布立人馬為防衛之勢又伏人槍中其夜慶雲道洛果
突出至槍馬各傷倒伏兵便起同時禽獲賊窮乞降而
已天光岳悅等議悉阮之死者萬七千人分其家口於
是三秦河渭瓜涼鄯善咸來款順詔復天光前官爵岳
聞榮死還涇州以待天光天光亦下隴與岳圖入洛之
策既而莊帝進天光爵為廣宗王元暉又以為隴西王

及聞爾朱兆已入京天光乃輕騎向都見世隆等尋便
還雍世隆等議廢元暕更舉親賢遣告天光天光與定
策立節閔帝又加開府儀同三司尚書令關西大行臺
天光北出夏州遣將討宿勤明達禽之送洛時費也頭
帥紇豆陵伊利万俟受洛干等據有河西未有所附天
光以齊神武起兵信都內懷憂恐不暇他事伊利等但
微遣備之而已又除大司馬時神武兵既振爾朱兆仲
遠等並經敗退世隆累使徵天光天光不從遂令斛斯

椿苦要天光云非王無以能定豈可坐看宗家之滅天
光不得已東下與仲遠等敗於韓陵斛斯椿等先還於
河橋拒之天光不得度西北走被執與度律並送於神
武神武送於洛陽斬於都市爾朱專恣分裂天下各據
一方賞罰自出而天光有定關西之功差不酷暴比之
兆與仲遠為不同矣

朱瑞字元龍代郡桑乾人也祖就沛縣令父惠行太原
太守瑞貴達並贈刺史瑞長厚質直敬愛人士爾朱榮

引為大行臺郎中甚見親任以為黃門侍郎仍兼中書
舍人榮恐朝廷事意有所不知故居之門下為腹心之
寄封陽邑縣公及元顥內逼從車駕於河陽除侍中兼
吏部尚書改封北海郡公莊帝還洛改封樂陵郡公仍
侍中瑞雖為爾朱榮所委而善處朝廷間帝亦賞遇之
嘗謂侍臣曰為人臣當須忠實至如朱元龍者朕待之
亦不異餘人瑞以青州樂陵有朱氏意欲歸之故求為
青州中正又以滄州樂陵亦有朱氏而心好河北遂乞

三從內並屬滄州樂陵郡詔許之仍轉滄州大中正爾
朱榮死瑞與世隆俱北走以莊帝待之素厚且見世隆
等並無雄才終當敗喪於路乃還帝大悅時爾朱天光
擁衆關右帝招納之乃以瑞兼尚書左僕射為西道大
行臺以慰勞焉既達長安會爾朱兆入洛復還京師都
督斛斯椿先與瑞有隙數譖之於世隆世隆遂誅之太
昌初贈開府儀同三司青州刺史謚曰恭穆

叱列延慶代西部人也世為酋帥延慶娶爾朱世隆姊

故被爾朱榮親遇普泰中世隆得志特見委重兼尚書
左僕射山東行臺北海郡公時幽州刺史劉靈助以莊
帝幽崩遂舉兵唱義世隆白節閔帝以延慶與大都督
侯深於定州討之深以靈助善占百姓信惑未易可圖
欲還師入據關拒嶮以待其變延慶以靈助庸人彼皆
恃其祇術坐看符獸寧肯戮力致死宜詭言西歸可襲
而禽深從之乃出頓城西聲云將還詰朝造靈助壘遂
破禽之及韓陵戰敗延慶與爾朱仲遠走度石濟仲遠

南竄延慶北降齊神武仍從并州後赴洛孝武帝以為
中軍大都督孝武之西齊神武誅之

斛斯椿字法壽廣牧富昌人也其先世為莫弗大人父
足一名敦明帝時為左牧令時河西賊起牧人不安椿
乃將家投爾朱榮征伐有功稍遷中散大夫署外兵事
椿性佞巧甚得榮心軍之密謀頗亦關預莊帝初改封
陽曲縣公除榮大將軍府司馬後為東徐州刺史及榮
死椿甚憂懼時梁以汝南王悅為魏主資其士馬次於

境上椿遂棄州歸悅悅授尚書左僕射司空公封靈邱
郡公又為大行臺前驅都督會爾朱兆入洛悅知不逮
南旋椿復背悅歸兆以參立節閔謀拜侍中驃騎大將
軍儀同三司封城陽郡公尋加開府時椿父足先在秀
容忽有傳其死問椿請減已階以贈之尋知其父猶存
詔復官仍除其父為車騎將軍揚州刺史椿以爾朱兆
擅權懼禍乃與賀拔勝俱說世隆以正道世隆不悅欲
害椿賴爾朱天光救得免及世隆度律與兆自相疑椿

與賀拔勝知之兆執椿勝還營椿又陳以正理兆謝而遣之椿謂勝曰天下皆怨毒爾朱吾等附之亡無日矣不如圖之勝曰天光與兆各據一方今俱禽為難椿曰易致耳乃說世隆追天光等赴洛討齊神武及韓陵之敗椿謂都督賈顯智等曰若不先執爾朱吾等死無類矣遂與顯智等夜於桑下盟約倍道兼行椿入北中城收爾朱部曲盡殺之令弟元壽與張歡長孫承業顯智等襲世隆彥伯兄弟並斬於閭闔門外椿入洛縣世隆

兄弟首於其門樹椿父出見謂曰汝與爾朱約為兄弟
今何忍縣其頭於家門寧不愧負天地椿乃傳世隆等
首并囚度律天光送於齊神武及神武入洛椿謂賀拔
勝曰今天下事在吾與君若不先制人將為人所制高
歡初至圖之不難勝曰彼有心於人害之不祥比數夜
與歡同宿具序歡往昔之懷謂荷兄恩意甚多何苦憚
之椿乃止孝武帝立拜椿侍中儀同開府城陽郡公父
足亦加開府子悅大中大夫同日受拜當時榮之椿自

以數反意常不安遂密勸孝武帝置閣內都督部曲又增武直人數百直閣以下員別數百皆選天下輕剽以充之又說帝數出游幸號令部曲別為行陣椿自約勒指麾其間從此以後軍謀朝政一決於椿又勸帝徵兵詭稱南討將以伐齊神武從之以椿為前驅大都督椿因奏請率精騎二千夜度河掩其勞弊帝始然之黃門侍郎楊寬說帝曰高歡以臣伐君何所不至今假兵於人恐生他變今度河萬一有功是滅一高歡復生一高

歡矣帝遂勅椿停行椿歎曰頃熒惑入南斗今上信左
右間搆不用吾計豈天道乎帝勒兵河橋命椿自洛而
東至虎牢帝以賈顯智背叛東師失律將幸關中乃遣
使命椿因從入關拜尚書令侍中如故封恒山郡公歷
位司徒太保仍尚書令時寇難未息內外戒嚴唯椿得
列威儀鳴騶清路遷太傅薨年四十三帝親臨弔百官
赴哭詔賜東園祕器遣尚書梁郡王景略監護喪事贈
大將軍錄尚書三十州諸軍事侍中恒州刺史恒山郡

王謚曰文宣祭以太牢又詔改大將軍贈大司馬給輜
輶車及葬車駕臨於渭陽止紼慟哭帝嘗給椿店數區
耕牛三十頭椿以國難未平不可與百姓爭利辭店受
牛日烹一頭以饗軍士及死家無餘貲有四子悅恢微
演演為神武所殺三子入關徵仕周入隋自有傳椿弟
元壽性剛毅諒直武力過人彎弓兩石左右馳射歷位
吏部尚書封桑乾縣伯孝武踐阼進爵為公除豫州刺
史及車駕西巡為部下所殺贈司空公謚曰景

賈顯度中山無極人也父道監沃野鎮長史顯度容貌
偉壯有志氣初為別將防守薄骨律鎮正光末北鎮擾
亂顯度乃率鎮人浮河而下達秀容為爾朱榮所留隨
榮破葛榮封石艾縣公累遷南兗州刺史爾朱榮之死
顯度奔梁普泰初還朝後隨爾朱度律等敗於韓陵與
斛斯椿及弟智等先據河橋誅爾朱氏孝武帝初除尚
書左僕射尋加驃騎大將軍開府儀同三司定州大中
正永熙三年為雍州刺史西南道大行臺親故祖餞於

張方橋顯度執酒曰顯智性輕躁好去就覆沒吾家此
其人也武帝入關後顯智果同於齊神武孝武帝怒乃
賜顯度死智字顯智少有膽決以軍功累遷金紫光祿
大夫封義陽縣伯及爾朱仲遠為徐州刺史智隸仲遠
赴彭城爾朱榮死仲遠舉兵向洛智不從之莊帝聞而
善之普泰初還洛仲遠忿其乖背議欲殺之智兄顯度
先為世隆所厚世隆為解喻得全後進爵為公隨度律
等敗於韓陵智與顯度斛斯椿謀誅契胡顯度據守北

中城令智等入京禽世隆兄弟孝武初除開府儀同三司滄州刺史在州貪縱甚為民害孝武徵還京師加侍中除濟州刺史率衆達東郡仍停不進於長壽津為相州刺史竇泰所破天平初赴晉陽智去就多端後坐事死

樊子鵠代郡平城人也其先荊州蠻酋徙代父興平城鎮長史歸義侯普泰中子鵠貴乃贈荊州刺史子鵠逢北鎮擾亂南至并州爾朱榮引為都督府倉曹參軍使

詣京師靈太后問榮兵勢子鵠應對稱旨太后嘉之除
直齋封南和縣子令還赴榮建義初拜晉州刺史封永
安縣伯永安二年以招納叛蜀進封中都縣公又兼尚
書行臺政有威信尋徵授都官尚書西荊州大中正後
兼右僕射為行臺進封西陽郡公尚書如故假驃騎將
軍率所部為都督時爾朱榮在晉陽京師之事子鵠頗
預委寄故在臺閣征官不解後出為殷州刺史屬旱儉
子鵠恐民流亡乃勒有粟家分濟貧者并遣人牛易力

多種二麥州內以此獲安爾朱榮死世隆等遣書招子
鵠子鵠不從以母在晉陽啓求移鎮河南莊帝嘉之除
都督豫州刺史行達汲郡聞爾朱兆入洛乃度河見仲
遠仲遠遣鎮汲郡兆徵子鵠赴洛既見責以乖異之意
奪其部衆將還晉陽元煜以為侍中御史中尉中軍大
都督太昌初兼尚書左僕射東南道大行臺總大都督
杜德等追討爾朱仲遠仲遠奔梁收其兵馬時梁遣元
樹入寇陷據譙城詔子鵠與德討之樹大敗奔入城門

遂圍之樹請歸南以地還魏許之及樹衆半出子鵠擊破之禽樹及梁譙州刺史朱文開班師還吏部尚書轉尚書右僕射尋加驃騎大將軍開府典選後除兗州刺史子鵠先遣腹心緣歷人間採察得失至境太山太守彭穆參候失儀子鵠責讓穆并數其罪狀穆皆引伏於是境內震悚及孝武帝入關子鵠據城為應南青州刺史大野拔率衆就子鵠天平初齊神武遣儀同三司婁昭等討之城久不拔昭以水灌城而大野拔因與相見

令左右斬子鵠以降

侯深神武尖山人也機警有膽略孝明末年六鎮饑亂
深隨杜洛周南寇後與妻兄念賢背洛周歸爾朱榮路
中遇寇身披苫褐榮賜其衣帽厚待之以為中軍副都
督莊帝即位封厭次縣子從榮討葛榮於淦口戰功尤
多除燕州刺史時葛榮別帥韓樓郝長等屯據薊城榮
令深討樓配衆甚少或以為言榮曰深臨機制變用其
所長若總大衆未必能用止給騎七百深遂廣張軍聲

率數百騎深入樓境去薊百餘里遇賊帥陳周馬步萬餘大破之虜其卒五千餘人尋還其馬仗縱令入城左右諫深深曰我兵少不可力戰事須為計以離隙之深度其已至遂率騎夜進昧旦叩其城門韓樓果疑降卒為內應遂遁走追禽之以功賜爵為侯尋為平州刺史仍鎮范陽及爾朱榮死太守盧文偉誘深出獵閉門拒之深率部曲屯於郡南為榮舉哀勒兵南向莊帝使東萊王貴平為大使慰勞燕薊乃詐降貴平信之遂執貴

平自隨進至中山行臺僕射魏蘭根擊之為深所敗元
暉立授深儀同三司定州刺史左軍大都督漁陽郡公
節閔帝立仍加開府後隨爾朱兆拒齊神武於廣阿兆
敗走深後從神武破爾朱氏於韓陵永熙初除齊州刺
史孝武帝末深與兗州刺史樊子鵠青州刺史東萊王
貴平使信往來以相連結又遣使通誠於神武及孝武
入關復懷顧望汝陽王暹既除齊州刺史深不時迎納
城人劉桃符等潛引暹入據城西深爭門不克率衆南

奔妻兒部曲為衆所虜行達廣固會承制以深行青州
事齊神武又遺深書曰卿勿以部曲輕少難於東邁齊
人澆薄齊州人尚能迎汝陽王青州人豈不能開門待
卿也深乃復還還始歸其部曲而貴平自以斛斯椿黨
亦不受代深襲高陽郡克之置部曲家累於城中親率
輕騎夜趣青州城人執貴平出降深自惟反覆慮不獲
安遂斬貴平傳首于鄴明不同於斛斯椿及子鵠平詔
以封延之為青州刺史深既不獲州任情又恐懼行達

廣固遂劫光州庫車反遣騎詣平原執前膠州刺史賈璐夜襲青州南郭劫前廷尉卿崔光韶以惑人情攻掠郡縣其部下督帥叛拒之遂奔梁達南青州境為賣漿者斬之傳首于鄴家口配沒

賀拔允字可泥神武尖山人也其先與魏氏同出陰山有如回者魏初為大莫弗祖爾頭驍勇絕倫以良家鎮武川因家焉獻文時以功賜爵龍城縣男為本鎮軍主父度拔性果毅爵亦為本鎮軍主正光末沃野人破

六韓拔陵反懷朔鎮將楊鈞聞度拔名召補統軍配以
一旅其賊偽署王衛可瓌徒黨尤甚既攻沒武川又陷
懷朔度拔父子並為賊所虜度拔乃與宇文肱合謀率
州里豪傑珍念賢乙弗庫根尉遲檀等招義勇嚴殺可
瓌朝廷嘉之未及封賞度拔與鐵勒戰沒孝昌中追贈
度拔肆州刺史允便弓馬頗有膽略初度拔之死允兄
弟俱奔恒州刺史廣陽王深深敗歸爾朱榮允父子兄
弟並以武藝稱榮素聞其名待之甚厚建義初封壽陽

縣侯永安中進爵為公魏長廣王立除開府儀同三司
燕郡王兼侍中使蠕蠕還至晉陽屬齊神武將出山東
允素知神武非常人早自結託神武以其北土之望尤
親禮之遂與允出信都參定大策中興初轉司徒領尚
書令神武入洛進爵為王轉太尉加侍中孝武既忌神
武以允弟岳據關中有重兵深相委託潛使來往當時
咸慮允為變及岳死孝武又委岳兄勝心腹之寄神武
重舊尤全護之天平元年因與神武獵或告允引弓擬

神武神武乃置於樓上餓殺之年四十八神武親臨哭之贈太保允三子世文世樂難陀興和末齊神武並召與諸子同學武定中勅居定州賜田宅允弟勝勝弟岳並立功宇文氏列在周史

侯莫陳悅代人也父婆羅門為駝牛都尉故悅長於河西好田獵善騎射會牧子作亂遂歸爾朱榮榮引為府長流參軍莊帝初除金紫光祿大夫封栢人縣侯爾朱天光之討關西悅以天光右廂大都督西伐克獲皆與

天光賀拔岳略同除鄯州刺史爾朱榮死後亦隨天光
下隴元暕立進爵為公改白水郡公普泰中除秦州刺
史天光之東出將抗齊神武悅與岳下隴以應神武至
雍州會爾朱覆敗永熙初加開府儀同三司都督隴右
諸軍仍兼秦州刺史三年岳召悅共討曹泥悅誘岳斬
之岳左右奔散悅遣人安慰衆皆畏服悅心猶豫不即
撫納乃還入隴止永洛城岳所部聚於平涼規還圖悅
周文時為夏州刺史衆遣奉迎周文至遂總岳部衆并

家口入高平城以自安固乃勒衆入隴征悅悅聞之棄城南據山水之險悅先召南秦州刺史李景和其夜景和遣人詣周文密許翻降至暮景和乃勒其所部使上驢馳云儀同有教欲還秦州守以拒賊復紿帳下云儀同欲還秦州汝等何不裝辦衆謂言實以次相驚皆散趣秦州景和先馳至城據門以慰輯之悅部曲離散猜畏傍人不聽左右近已與其二弟并兒及謀殺岳者八九人棄軍迸走數日之中樂回往來不知所趣左右勸

回靈州而悅不決言下隴後恐為人見乃放馬山中令從者悉步自乘一驢欲往靈州中路追騎將及縊死野中弟息部下悉見禽殺唯先謀殺岳者悅中兵參軍豆盧光走至靈州後奔晉陽悅自殺岳後精神恍惚不復如恒恒言我睡即夢岳語我兄欲何處去隨逐我不相置因此彌不自安而致敗滅

念賢字孟盧金城柁罕人也父求就以大家子戍武川鎮乃家焉賢美容質頗涉經史為兒童時在學中讀書

有善相者過學諸生競詣之賢獨不往笑謂諸生曰男
兒死生富貴皆在天也何遽相乎少遭父憂居喪有孝
稱後以破衛可瓌功除別將又以軍功封屯留縣伯從
爾朱榮入洛兼尚書右僕射東道行臺進爵平恩縣公
永熙中孝武以賢為中軍北向大都督進爵安定郡公
加侍中開府儀同三司大統初拜太尉為秦州刺史加
太傅給後部鼓吹三年轉太師都督河州刺史大將軍
久之還朝兼錄尚書事後與廣陵王欣扶風王季等同

為正直侍中時行殿初成未有題目帝詔近侍各名之
對者非一莫允帝心賢乃名為圓極帝笑曰正與朕意
同即以名之河橋之役賢不力戰乃先還自是名頗減
五年除都督秦州刺史薨於州謚曰昭定賢於諸公皆
為父黨自周文以下咸拜敬之子華性和厚有長者風
官至開府儀同三司合州刺史

梁覽字景叡金城人也其先出自安定避難走西羌世
為部落酋帥曾祖穆以枹罕城歸吐谷渾後又歸魏封

臨洮公祖顯為尚書封南安公父釗河華二州刺史封
新陽縣伯覽家世豪富貲累千金孝昌初秦州莫折念
生胡琛等反散財招募有三千人鎮河州從大軍平賊
歷涼河二州刺史封安德縣侯覽既為本州刺史盛脩
甲仗人馬精銳吐谷渾憚不敢出皆曰梁公在未可行
也永安中詔大鴻臚琅邪王皓就策授世為河州刺史
永熙中改封郡公大統二年加太尉其年覽從弟念定
反欲圖覽覽與數戰未能平王師至始破之四年遷太

傳及河橋之役王師敗時病留長安趙青雀反北城覽
為之謀主事平乃見殺子鵲雀位儀同三司大都督後
坐事免死

雷紹字道宗武川鎮人也九歲而孤有膂力善騎射年
十八給事鎮府嘗使洛陽見京都禮義之美還謂同僚
曰徒知邊備尚武以圖富貴不謂文學身之寶也生世
不學其猶穴處何所見焉遂逃歸辭母求師經年通孝
經論語嘗讀書至人行莫大於孝乃投卷歎曰吾離違

欽定四庫全書

通志
卷一百五十一

九

侍養非人子之道即還鄉里躬耕奉養遭母憂哀毀骨
立由是知名鎮將召補鎮佐後隨賀拔岳征討為岳長
史岳有大事常訪而後行及齊神武起兵岳恥居其下
紹乃勸迎孝武西都長安以順討逆岳曰吾本意也後
岳信諸將言欲保關中坐觀成敗紹知計不用請為邊
州建功効岳曰君有毗佐之力當總大州遂以紹為京
兆太守清平理物甚得人和在郡踰年岳被害初紹見
岳數與侯莫陳悅宴語嘗謂岳曰君其慎之岳不從果

及於難紹乃棄郡馳赴岳軍與寇洛等迎周文悅平以
功授大都督涼州刺史紹請留所領兵以助東討請單
騎赴州刺史李叔仁擁州逆命紹遂歸永熙三年以紹
為渭州刺史進爵昌國伯初紹為岳長史周文為岳左
丞及居相位常以恩舊接之卒於州紹性好施祿賜皆
分贍親故及死日無以送終兼敬信佛道勅其子曰吾
本鄉葬法必殺犬馬於亡者無益汝宜斷之斂以時服
事從約儉還葬長安天子素服臨弔贈太尉賜東園祕

器子渙

毛遐字鴻遠北地三原人也世為首帥曾祖天愛太武
時至定州刺史始昌子傳至遐四世不絕正光中蕭寶
夤為大都督討關中諸賊咸陽太守韋邃時為都督以
遐為都督府長史寶夤敗還長安三輔騷擾遐因辭邃
還北地與弟鴻賓聚鄉曲豪傑遂東西略地氐羌多赴
之共推鴻賓為盟主既而賊帥宿勤買奴自號京兆王
於北地遐詐降之而與鴻賓攻其壁賊自相斫射縱兵

追擊七柵皆平後寶夤構逆謀遐知之乃寄書與鴻賓
索馬迎接復於馬祗柵建旗鼓以拒寶夤攻其將盧祖
遷禽之寶夤以是日拜南郊竊號禮未畢而告敗寶夤
懼口乾色變不遑部伍人皆亂還詔授遐南幽州刺史
進爵為伯遐又攻破其將侯終德寶夤知內外勢異輕
將十數騎走巴中冬万俟醜奴陷秦州詔以遐兼尚書
二州行臺孝武帝入關勅周文置二尚書分掌機事遐
與周惠達始為之稍遷驃騎大將軍開府儀同三司卒

遐少任俠有智謀世為豪右貲產巨億士流貧乏者多
被振贍故中書郎檀翥尚書郎公孫範等常依託之至
於自供衣食麤弊而已死之日鄉黨赴葬咸共痛惜鴻
賓大鼻眼多鬚鬚黑而且肥狀貌頗異氏羌見者皆畏
之加膽略騎射倣儻不拘小節昆季之中尤輕財好施
遐雖云早立而名出其下及賊起鄉里推為盟主常與
遐一守一戰後拜岐州刺史散騎常侍開國縣侯遐笑
謂鴻賓曰擊賊之功吾不居汝後至於受賞汝在吾前

當以德濟物不及汝故耳明帝以鴻賓兄弟所定處多
乃改北地郡為北雍州以鴻賓為刺史詔曰此以晝錦
榮卿也改三原縣為建中郡以旌其兄弟後爾朱天光
自關中還洛夷夏心所忌者皆將自隨鴻賓亦領鄉中
壯武二千人以從洛中素聞其名衣冠貧冗者競與之
交尋拜西兗州刺史羈寓倦游之輩四座常滿鴻賓資
給衣食與已悉同私物不足頗有公費轉南青州刺史
未幾徵還為有司所糾鴻賓遂逃匿民間月餘詔特原

之及孝武帝與齊神武有隙令鴻賓鎮潼關為西道之
寄車駕西幸漿糗乏絕侍官三二日間唯飲澗水鴻賓
奉獻酒食迎於稠桑文武從者始解饑渴武帝把其手
曰寒松勁草所望於卿也事平之日寧忘主人仍令守
潼關後神武來寇見禽至并州憂恚卒鴻賓弟鴻顯位
散騎常侍封縣侯遐乳母所產也一字七寶遐養之為
弟因姓毛氏勁悍多力後隨諸兄戰閬多先鋒陷敵大
統四年為廣州刺史與駱超鎮東陽陷東魏卒子野义

乙弗朗字通照其先東部人也世為部落大人與魏徒
出因家上樂焉朗少有俠氣在鄉里以善騎射稱孝莊
末北境擾亂避地居并肆間爾朱榮見而重之甚相接
待以功封蓮勺子後隸賀拔岳從爾朱天光西討為岳
左廂都督孝武帝之禦齊神武授朗閭內大都督及帝
西入詔朗為軍師先驅靖路至長安封長安縣公卒於
岐州刺史初朗患積冷周文賜二石東生散令朗如法
服之使人問疾朝夕相繼其見重如此臨終惟云恨不

見河洛清平重反京縣以此為恨三舉手槌牀而使氣
盡贈太尉子鳳位宮伯開府儀同三司與周閔帝謀誅
宇文護見殺

辛雄字世賓隴西狄道人也父暢汝南鄉郡二郡太守
雄有孝性居父憂殆不可識頗涉書史好刑名廉謹雅
素不妄交友喜怒不形於色釋褐奉朝請清河王懌為
司空辟為左曹撫田曹事懌遷司徒仍授左曹並當煩
劇爭訟填委雄用心平直加以開明政事經其剖斷莫

不成服懌重之每謂人曰必也無訟辛雄其有焉遷尚
書駕部三公郎其年沙汰郎官唯雄與羊深等八人見
留餘悉罷遣先是御史中丞東平王匡復欲興棺諫諍
尚書令任城王澄劾匡大不敬詔恕死雄奏理匡曰竊
見白衣元匡歷奉三朝每蒙寵遇謇諤之性簡在帝心
鷹鷂之志形於在昔故高祖錫之以匡名陛下任之以
彈糾當高肇之時匡造棺致諫主聖臣直卒以無咎假
欲重造先帝已容之於前陛下宜寬之於後祁奚云叔

向之賢可宥十世而匡不免其身實可嗟惜未幾匡除
平州刺史右僕射元欽謂左僕射蕭寶夤曰辛郎中才
用省中諸人莫出其右者寶夤曰吾聞游僕射云得如
雄者四五人共省事足矣今日之賞何其晚哉初廷尉
少卿袁翻以犯罪之人經恩競訴枉直難明遂奏曾染
風聞者不問曲直推為獄成悉不斷理詔門下尚書廷
尉議之雄議曰春秋之義不幸而失寧僭不濫僭則失
罪人濫乃害義人今議者不忍罪姦吏使出入縱情令

君子小人薰蕕不別豈所謂賞善罰惡懲慝恤者也
古人唯患察獄之不精未聞知寃而不理語從雄議自
後朝廷每有疑議雄與公卿駁難事多見從於是公能
之名甚盛又為祿養論稱仲尼陳五孝自天子至於庶
人無致仕之文禮記八十一子不從政九十家不從政
鄭元注云復除之然則止復庶人非公卿大夫士之謂
以為宜聽祿養不約其年書奏孝明納之冀州刺史侯
剛啓為長史孝明以雄長於世務惜不許之更除司空

長史時諸公皆慕其名欲屈為佐莫能得也時諸方賊盛而南寇侵境山蠻作逆孝明欲親討以荊州為先詔雄為行臺左丞與臨淮王或東趣葉城別將裴衍西通鵝路衍稽留未進或師已次汝濱逢北渣求救或以處分道別不欲應之雄曰王執麾閫外唯利是從見可而進何必守道或恐後有得失之責要雄符下雄以車駕將親伐蠻夷必懷震動垂彼離心無往不破遂符或軍令速赴擊賊聞果自走散在軍上疏曰凡人所以臨堅

陣而忘身觸白刃而不憚者一則求榮名二則貪重賞
三則畏刑罰四則避禍難非此數事雖聖主不能勸其
臣慈父不能厲其子明主深知其情故賞必行罰必信
使親疎貴賤勇怯賢愚聞鐘鼓之聲見旂旗之列莫不
奮激赴敵場豈厭久生而樂早死也利害縣於前欲罷
不能耳自秦隴逆節將歷數年蠻左亂常稍已多載凡
在戎役數十萬人三方之師敗多勝少跡其所由不明
賞罰故也陛下欲天下之早平愍征夫之勤悴乃降明

詔賞不移時然兵將之勤歷稔不決亡軍之卒晏然在家致令節士無所勸慕庸人無所畏懾進而擊賊死交而賞賒退而逃散身全而無罪此其所以望敵奔沮不肯進力者矣若重發明詔更量賞罰則軍威必張賊難可弭臣聞必不得已去食就信以此推之信不可斯須廢也賞罰陛下之所易尚不能全而行之攻敵士之所難欲其必死寧可得也後為吏部郎中會爾朱榮入洛及河陰之難人情未安雄潛竄不出莊帝欲以為尚書

門下奏曰辛雄不出存亡未分帝曰寧失亡而用之可
失存而不用也遂除度支尚書後以本官兼侍中關西
慰勞大使將發請事五條一言逋懸租調宜悉不徵二
言簡罷非時徭役以紓民命三言課調之際使豐儉有
殊令州郡量檢不得均一四言兵起歷年死亡者衆或
父或子辛酸未歇見存者老請假版職悅生者之意慰
死者之魂五言喪亂既久禮儀罕習如有閨門和穆孝
悌卓然者宜表其門閭莊帝從之因詔人年七十者授

縣八十授郡九十加四品將軍百歲從三品將軍永熙
二年兼吏部尚書時近習專恣雄懼其讒慝不能守正
論者頗譏之孝武南狩雄兼左僕射留守京師永熙末
兼侍中帝入關右齊神武至洛於永寧寺大集朝士責
雄及尚書崔孝芬劉廐楊機等曰為臣奉主匡危救亂
若處不諫諍出不陪隨緩則耽寵急則竄避臣節安在
乃誅之二子士璨士貞逃入關中雄從父兄纂字伯將
學涉文史溫良雅正初為兗州安東府主簿與祕書丞

同郡李伯尚有舊伯尚與咸陽王禧同逆逃竄投纂事
覺坐免官後為太尉騎兵參軍每為府主清河王懌所
賞至定考懌曰辛騎兵有學有才宜為上第及梁將曹
義宗攻新野詔纂為荊州軍司纂善撫將士人多用命
賊甚憚之會孝明崩諱至咸以對敵欲祕凶問纂曰安
危在人豈闕是也遂發喪號哭三軍縞素還入州城中
以盟約尋為義宗所圍相率固守孝莊即位除蕪尚書
仍行臺後大都督費穆擊義守禽之入城因舉酒屬纂

曰微卒行臺之在斯吾亦無由建此功也永安二年元
顥乘勝至城下為顥所禽及孝莊還官纂謝不守之罪
帝曰於時朕亦北巡東軍不守豈卿之過轉滎陽太守
百姓姜洛生康乞得者舊是前太守鄭仲明左右豪猾
偷竊境內患之纂伺捕禽獲梟於郡市百姓欣然纂僞
屬洛陽太昌中乃為河南邑中正永熙三年除河內太
守齊神武赴洛兵集城下纂出城謁神武慰勉之因命
前侍中司馬子如曰吾行途疲弊宜待吾執河內手也

尋為兼尚書南道行臺西荊州刺史時蠻酋樊大能應西魏纂攻之不克而敗為西魏將獨孤信所害贈司徒公雄族祖琛字僧貴祖敬宗父樹寶並代郡太守琛少孤曾過友人見其父母無恙垂涕久之釋褐奉朝請榮陽郡丞太守元麗性頗使酒琛每諫之麗後醉輒令閉閤曰勿使丞入也孝文南征麗從輿駕詔琛曰委卿郡事如太守也景明中為揚州征南府長史刺史李崇多事產業琛每諫折崇不從遂相糾舉詔並不問後加龍

驤將軍南梁太守崇因置酒謂琛曰長史後必為刺史
但不知得上佐何如人耳琛對曰若萬一叨忝得一方
正長史朝夕間過是所願也崇有慙色卒於官琛寬雅
有度量涉獵經史喜愠不形於色當官奉法所在有稱
長子悠字元壽早有器業為侍御史監揚州軍賊平錄
勲書時李崇猶為刺史欲寄人名悠不許崇曰我昔逢
其父今復逢其子早卒悠弟俊字叔義有文才魏子建
為山南行臺以為郎中有軍國機斷還京於滎陽為人

所劫害贈東秦州刺史俊弟術列在齊史

楊機字顯略天水冀人也祖伏恩徙居洛陽因家焉機
少有志節為士流所稱河南尹李平元暉並召署功曹
暉尤委以郡事或謂暉曰弗躬弗親庶民弗信何得委
事於機高卧而已暉曰吾聞君子勞於求士逸於任賢
故前代有坐嘯之人主諾之守吾既委得其才何為不
可由是聲名更著解褐奉朝請時皇子國官多非其人
詔選清直之士機見舉為京兆王愉國中尉愉甚敬憚

之後為洛陽令京輦伏其威風希有干犯凡訴訟者一經其前後皆識其名姓并記其事理世咸異之歷司州別駕清河內史河北太守並有能名永熙中遷度支尚書機方直之心久而彌厲奉公正已為時所稱家貧無馬多乘小犢車時論許其清白與辛雄等並為齊神武所誅

高恭者字道穆自云遼東人也祖潛獻文初賜爵陽關男詔以沮渠牧犍女賜潛為妻封武威公主拜駙馬都

尉父崇字積善少聰敏以端謹稱家資富厚而崇志尚
儉素初崇舅氏坐事誅公主痛本生絕允遂以崇繼牧
捷後改姓沮渠景明中啓復本姓襲爵除洛陽令為政
清斷吏人畏其威風發擿不避彊禦縣內肅然卒贈滄
州刺史謚曰成道穆以字行於世學涉經史所交皆名
流勝士幼孤事兄如父每謂人曰人生厲心立行貴於
見知當使夕脫羊裘朝佩珠玉若時不我知便退迹江
海自求其志御史中尉元匡高選御史道穆奏記於匡

以求備選匡大喜曰吾久知其人適欲召之遂引為御史其糾擿不避權豪臺中綱紀多為所正正光中出使相州前刺史李世哲即尚書令崇之子多有非法逼買人宅廣興屋宇皆置鴟尾又於馬埒堠上為木人執節道穆繩糾悉毀去之并表發其贓貨爾朱榮討蠕蠕道穆監其軍事榮甚憚之蕭寶夤西征以道穆為行臺郎中軍機之事皆以委之後屬兄謙之被害情不自安遂攜家趣濟陰變易姓名以避難託身於孝莊孝莊時為

侍中深相保護及即位賜爵龍城侯召為吏部郎除太尉長史領中書舍人及元顥逼虎牢或勸帝赴關西者帝以問道穆道穆對曰關中今日殘荒何由可往臣謂元顥兵衆不多乘虛深入者由國家將帥不得其人耳陛下若親率宿衛高募重賞背城一戰臣等竭其股肱破顥必矣如恐成敗難測便宜車駕北渡循河東下別召爾朱榮令赴河內以掎角之為萬全之計帝曰高舍人語是其夜到河內郡北帝命道穆燭下作詔書數十

紙布告遠近然後四方知乘輿所在除中軍給事黃門侍郎安喜縣公於是爾朱榮欲迴師待秋道穆謂榮曰元顥以蕞爾輕兵奄據京洛使乘輿飄露人神恨憤主憂臣辱良在於今大王擁百萬之衆輔天子令諸侯自可分兵河畔縛筏造船處處遣渡徑禽群賊復主宮闕此五伯之舉且一日縱敵為世之患今若還師令顥重完守具徵兵天下所謂養虺成蛇悔無及矣榮深然之及莊帝反政因宴次謂爾朱榮曰前若不用高黃門計

則社稷不安可為朕勸其酒令醉榮因陳其作監軍時
臨事能決實可任用尋除御史中尉仍兼黃門道穆外
秉直繩內參機密凡是益國利人之事必以奏聞諫諍
盡言無所顧忌選用御史皆當世名輩李希崇李繪陽
休之陽斐封君義邢子明蘇淑宋世良等三十人於時
用錢稍薄道穆奏曰百姓之業錢貨為本救弊改鑄王
政所先自頃以來私鑄薄濫官司糾繩持網非一在市
銅價八十一文得銅一斤私鑄薄錢斤餘二百既示之

以深利又隨之以重刑得罪者雖多姦鑄者彌衆今錢徒有五銖之文而無二銖之實薄甚榆莢上貫便破置之水上殆欲不沈因循有漸科防不切朝廷失之彼復何罪昔漢文帝以五分錢小改鑄四銖至武帝復改三銖為半兩此皆以大易小以重代輕也論今據古宜改鑄大錢文載年號以記其始則一斤所成止七十六文銅價至賤五十有餘其中人功食料錫炭鉛砂綴復私營不能自潤直置無利自應息心況復嚴刑廣設也以

臣測之必當錢貨永通公私獲允遂用楊侃計鑄永安五銖錢僕射爾朱世隆當朝權盛因內見衣冠失儀道穆便即彈糾帝姊壽陽公主行犯清路執赤棒卒呵之不止道穆令卒棒破其車公主深以為恨以泣訴帝帝謂主曰高中尉清直之人彼所行者公事豈可以私恨責之道穆後見帝帝曰一日家姊行路相犯深以為愧道穆免冠謝曰臣奉陛下法不敢於公主虧朝典帝曰朕以愧卿卿反謝朕尋勅監儀注又詔祕書圖籍及內

典書綑素多致零落可令道穆總集帳目并牒儒學之士編比次第道穆又上疏曰高祖太和之初置廷尉司直論刑辟是非雖事非古始交濟時要竊見御史出使悉受風聞雖時獲罪人亦不無枉濫何者得堯之罰不能不怨守令為政容有愛憎姦猾之徒恒思報惡多有妄造無名共相誣謗御史一經檢究恥於不成杖木之下以虛為實無罪不能自雪者豈可勝道哉臣雖愚短守不假罷繡衣所指冀以清肅若仍更踵前失或傷善

人則尸祿之責無所逃罪如臣鄙見請依太和故事還置司直十人名隸廷尉以五品選歷官有稱心平性直者為之御史若出糾劾即移廷尉令知人數廷尉遣司直與御史俱發所到州郡分居別館御史檢了移付司直司直覆問事訖與御史俱還中尉彈聞廷尉科律一如舊式度使獄成罪定無復稽寬為惡取敗不得稱枉若御史司直糾劾失實悉依所斷獄罪之聽以所檢迭相糾發如二使阿曲有不盡理聽罪家詣門下通訟別

加案檢如此則肺石之傍怨訟可息藪棘之下受罪吞聲者矣詔從之復置司直及爾朱榮死帝召道穆付赦書令宣於外因謂之曰自今日後當得精選御史矣先是榮等常欲以親黨為御史故有此詔及爾朱世隆等戰於大夏門北道穆受詔督戰又贊成太府卿李苗斷橋之計世隆等於是北遁加衛將軍大都督兼尚書右僕射南道大行臺時雖外託征蠻而帝恐北軍失利欲為南巡之計未發會爾朱兆入洛道穆慮禍託病去官

世隆以其忠於前朝遂害之太昌中贈車騎大將軍儀
同三司雍州刺史子士鏡襲爵為北豫州刺史道穆兄
謙之字道驤少事母以孝聞專意經史天文算厯圖緯
之書多所該涉好文章留心老易龔父爵釋褐奉朝請
孝昌中行河陰令先是有人囊盛瓦礫指作錢物詐市
人馬因以逃去詔令追捕必得以聞謙之乃偽枷一人
因立於馬市宣言是前詐市馬賊今欲刑之密遣察市
中私議者有二人相見忻然曰無復憂矣執送案問悉

獲其黨并出前後盜處失物之家各得其本物具以狀
告尋正河陰令在縣二年損益政體多為故事時道穆
為御史亦有能名世美其父子兄弟並著當官之稱舊
制二縣令得面陳得失時佞幸之輩惡其有所發聞遂
共奏罷謙之乃上疏曰臣以無庸謬宰神邑實思奉法
不撓稱是官方酬朝廷無貲之恩盡人臣守器之節但
豪家支屬戚里親媾縲紲所及舉目多是皆有盜憎之
色咸起惡上之心縣令輕弱何能克濟先帝昔發明詔

得使面陳所懷臣亡父先臣崇之為洛陽令常得入奏
是非所以朝貴歛手無敢干政近年以來此制遂寢致
使神宰威輕下情不達今二聖遠遵堯舜憲章高祖愚
臣亦望策其駑蹇少立功名乞行新典更明往制庶姦
豪知禁頗自屏心詔付外量聞謙之又上疏以為自正
光以來邊城屢擾命將出師相繼於路但諸將帥或非
其才多遣親者妄稱入募唯遣奴客充數而已對寇臨
敵略不彎弓則是王爵虛加征夫多闕賊虜何可殄除

忠貞何以勸誠也且近習侍臣戚屬朝士請託官曹擅作威福如有清貞奉法不為回者咸共譖毀橫受罪罰在朝顧問誰肯申聞蔽上擁下虧風損政使讒諂甘心忠讜息議且頻年以來多有徵發人不堪命動致流離苟保妻子競逃王役不復顧其桑井憚此刑書正由還

有必困之理歸無自安之路若聽歸其本業徭役微甄則還者必衆墾田增闢數年之後大獲課入今不務以理還之但欲嚴符切勒恐數年之後走者更多故有國

有家者不患人不我歸唯患政之不立不恃敵不我攻
唯恃吾不可侮此乃千載共遵百王一致伏願少垂覽
察靈太后得其疏以責左右近侍諸寵要者由是疾之
乃啓太后云謙之有學藝宜在國學以訓胄子詔從之
除國子博士謙之與袁翻常景鄺道元溫子昇之徒咸
申款舊好施贍恤言諾無虧居家僮隸對其兒不撻其
父母生三子便免其一世無髡黥奴婢常稱俱稟人體
如何殘害謙之以父舅氏沮渠蒙遜曾據涼土國書漏

闕謙之乃修涼書十卷行於世涼國盛事佛道為論貶之因稱佛是九流之一家當世名流競以佛理來難謙之還以佛義對之竟不能屈以時所行歷多未盡善乃更改元脩者撰為一家之法雖未行於世識者歎其多能時朝議鑄錢以謙之為鑄錢都將長史乃上表求鑄三銖錢曰蓋錢貨之立本以通有無便交易故錢之輕重世代不同太公為周置九府圜法至景王時更鑄大錢秦兼海內錢重半兩漢興以秦錢重改鑄榆莢錢至

文帝五年復為四銖孝武時悉復銷壞更鑄三銖至元狩中變為五銖又造赤仄之錢以一當五王莽攝政錢有六等大錢重十二銖次九銖次七銖次五銖次三銖次一銖魏文帝罷五銖錢至明帝復立孫權江左鑄大錢一當五百權赤烏年復鑄大錢一當十輕重大小莫不隨時而變竊以食貨之要八政為首聚財之貴詒訓典文是以昔之帝王垂天地之饒御海內之富莫不腐紅粟於太倉藏朽貫於泉府儲畜既盈人無困弊可以

寧謐四海如身使臂者矣昔漢之孝武地廣財饒外事
四戎遂虛國用於是草茅之臣出錢助國興利之計納
稅廟堂市列榷酒之官邑有告緡之令鹽鐵既興錢幣
屢改少府遂置上林饒積外闢百蠻內不增賦者皆計
利之由也今羣祿未息四郊多壘徵稅既煩千金日費
倉儲漸耗財用將竭誠楊氏獻稅之秋桑兒言利之日
夫以西京之盛錢猶屢改並行大小子母相權況今寇
難未除州郡淪敗人物彫零軍國用少別鑄小錢可以

富益何損於政何妨於人也且政興不以錢大政哀不以錢小唯貴公私得所政化無虧既行之於古亦宜效之於今矣若禹遭大水以歷山之金鑄錢救人之困湯遭大旱以莊山之金鑄錢贖人之賣子者今百姓窮悴甚於曩日欽明之主豈得垂拱而觀之哉臣今此鑄以濟交乏五銖之錢任使並用行之無損國得其益詔將從之事未就會卒初謙之弟道穆正光中為御史糾相州刺史李世哲事大相挫辱其家恒以為憾至是世哲

弟靈軌為靈太后深所寵任會謙之家僮訴良神軌左
右之入諷尚書判禁謙之於廷尉時將赦神軌乃啓靈
太后發詔於獄賜死朝士莫不哀之所著文章百餘篇
別有集錄永安中贈營州刺史謚曰康又除一子出身
以明寬屈謙之弟謹之字道脩父崇既還本姓以謹之
繼沮渠氏

綦儁字擲顯河南略陽人也其先居代儁孝莊時仕累
遷為滄州刺史甚為吏民畏悅尋除太僕卿及爾朱世

隆等誅齊神武召文武百司下及士庶議所立莫有應者
偽避席對曰廣陵雖為爾朱扶戴當今之聖主也神武將從之時黃門崔悛議不同高乾魏蘭根等固執悛言遂立孝武帝及帝入關神武深思偽言常以為恨尋除御史中尉於路與僕射賈顯度相逢顯度恃勲貴排偽驕列倒偽忿見於色自入秦之尋加散騎常侍驃騎大將軍左光祿大夫儀同三司偽巧佞能候當塗斛斯椿賀拔勝皆與友善性多詐賀拔勝出鎮荊州過偽別

因辭雋母雋故見敗氈弊被勝更遺之錢物後兼吏部
尚書復為滄州刺史徵還兼中尉章武縣伯尋除殷州
刺史薨於州贈司空謚曰文貞子洪寔字巨正位尚書
左右郎魏郡邑中正嗜酒好色無行檢卒官

山偉字仲才河南洛陽人也其先居代祖彊美容貌身
長八尺五寸工騎射彎弓五石為奏事中散從獻文獵
方山有兩狐起於御前詔彊射之百步內二狐俱獲位
內行長父幼之位金明太守偉涉獵文史孝明初元佳

為御史中尉以偉兼侍御史入臺五日便遇正會偉司
神虎門其妻從叔為羽林隊主樞直長於殿門偉即劾
奏其善之俄然奏正帖國子助教遷員外郎廷尉評時
天下無事進仕路難代遷之人多不需預及六鎮隴西
二方起逆領軍元乂欲用代來寒人為傳詔以慰悅之
而牧守子孫投狀求者百餘人乂因奏立勲附隊令各
依資出身自是北人悉被收叙偉遂奏記贊乂德美乂
素不識偉訪侍中安豐王延明黃門郎元順順等因是

薦之。又令僕射元欽引偉。兼尚書二千石。郎後正名士。郎脩起居注。僕射元順領選表薦為諫議大夫。爾朱榮之害朝士。偉時守直。故免禍。及孝莊入宮。仍除給事黃門侍郎。先是偉與儀曹郎素昇、屯田郎李延考、外兵郎李奐、三公郎王延業方駕而行。偉少居後路。逢一尼望之。嘆曰：「此輩緣業同日而死。謂偉曰：『君方近天子。當作好官。』」既而昇等四人皆死於河陰。竟如其言。俄領著作郎。節閔帝立。除祕書監。仍著作。初。爾朱兆之入洛。官守

奔散國史典書高法顯密埋史書故不遺落偉自以為
功訴求爵賞偉挾附世隆遂封東阿縣伯而法顯止獲
男爵偉尋進侍中孝靜初除衛大將軍中書令監起居
後以本官復領著作卒官贈驃騎大將軍開府儀同三
司都督幽州刺史謚曰文貞公國史自鄧淵崔深崔浩
高允李彪崔光以還諸人相繼撰錄纂偽及偉等諂說
上黨王天穆及爾朱世隆以為國書正應代人脩緝不
宜委之餘人是以偽偉等更主大籍守舊而已初無述

著故自崔鴻死後迄終偉身二十許載時事蕩然萬不
記一後人執筆無所憑據史之遺闕偉之由也偉外示
沈厚內實矯競與綦儁少甚相得晚以名位之間遂若
水火與宇文忠之之徒代人為黨時賢畏惡之而愛尚
文史老而彌篤偉弟少亡偉撫寡訓孤同居二十餘年
恩義甚篤不營產業身亡之後賣宅營葬妻子不免飄
泊士交歎愍之長子昂龍爵

宇文忠之河南略陽人也其先南單于之遠屬世據東

郡後居代都父侃卒於書侍御史忠之涉獵文史頗有
筆札釋褐太學博士天平初除中書侍郎裴伯茂與之
同省常侮忽之以忠之色黑呼為黑子後勅修國史元
象初兼通直散騎常侍副鄭伯猷使梁武定初為尚書
右丞仍脩史未幾以事除名忠之好榮利自為中書郎
六七年遇尚書省選右丞預選者皆射策忠之試焉既
獲丞職大為忻滿志氣囂然有驕物之色識者笑之既
失官爵怏怏發疾卒子君山

費穆字朗興代人也祖于位商賈二曹令懷州刺史賜爵松陽男父萬襲爵位梁州鎮將贈冀州刺史穆性剛烈有壯氣頗涉文史好尚功名宣武初襲爵稍遷荊州平西府長史皇甫集靈太后之元舅恃外戚之親多為非法穆正色匡諫集亦憚之後蠕蠕主婆羅門自涼州歸附其部衆因饑侵掠邊邑詔穆銜旨宣慰莫不款附明年復叛入寇涼州除穆尚書右丞西北道行臺仍為別將往討之穆至涼州蠕蠕遁走穆謂其所部曰夷狄

獸心見敵便走若不令其破膽終恐疲於奔命乃簡練精騎伏於山谷使羸劣之衆為外營以誘之賊騎覘見俄而競至伏兵奔擊大破之及六鎮反叛穆為別將隸都督李崇北伐都督崔暹失利崇將議班師以朔州是白道之衝賊之咽喉若不全則并肆危選將鎮捍僉議舉穆崇乃請穆為朔州刺史尋改雲州刺史穆招離聚散頗得人心北境州鎮皆沒唯穆獨存久之援軍不至穆乃棄城南走投爾朱榮於秀容既而詣闕請罪詔原

之孝昌中以都督討平二絳反蜀拜散騎常侍後祆賊李洪於陽城起逆連結蠻左詔穆兼武衛將軍擊破之及爾朱榮向洛靈太后徵穆令屯小平榮推奉孝莊穆遂先降榮素知穆見之甚悅穆潛說榮曰公士馬不出萬人長驅向洛前無橫陳者政以推奉主上順人心故今以京師之衆百官之盛一知公之虛實必有輕侮之心若不大行討罰更樹親黨公還北之日恐不得度太行而內難行矣榮心然之於是有河陰之事天下聞之

莫不切齒榮入洛穆為吏部尚書魯縣侯進封趙平郡
公為侍中前鋒大都督與大將軍元天穆平邢杲時元
顥入京師穆與天穆既平齊地將擊顥穆圍虎牢將拔
屬天穆北度既無後繼穆遂降顥顥以河陰酷濫事起
於穆引入詰讓殺之孝莊還宮贈侍中司徒公謚曰武
宣

孟威字能重河南洛陽人也頗有氣尚尤知北土風俗
歷東宮齋帥羽林監後以明解北人語勅在著作以備

推訪累遷沃野鎮將前後頻使遠蕃粗能稱旨普泰中
除大鴻臚卿贈司空公子恂嗣



通志卷一百五十一